


神農本草經疏

十三之十四

特	別
79	
173	
9	

九



門武
173
卷 9

神農本草經疏卷之十三

木部中品

總九十二種今疏其要者二十六種

桑根白皮

葉耳堪灰
枝黃附

竹葉

茹瀝
附

吳茱萸

檳榔

梔子

騏驎竭

龍腦香

蕪荑

枳殼

枳實

厚朴

茗苦茶

山茱萸

紫葳



胡桐淚

猪苓

烏藥

沒藥

安息香

仙人杖

海桐皮

大腹

合歡

五倍子

天竺黃

蜜蒙花

桑根白皮味甘寒無毒主傷中五勞六極羸瘦
 崩中脉絕補虛益氣去肺中水氣唾血熱渴水
 腫腹滿臚脹利水道去寸白可以縫金瘡出土
 上者殺人

疏○桑根白皮得土金之氣故味甘氣寒而
 無毒東垣海藏俱云兼辛然甘厚辛薄降多
 升少陽中陰也入手太陰經甘以固元氣而
 補不足辛以瀉肺邪之有餘故能止嗽也凡
 肺中有水氣及肺火有餘者宜之傷中者中
 氣傷也五勞者五臟勞傷也六極者六腑之
 中氣極也羸瘦者肌肉脫也崩中者血脫也
 脉絕者氣血兩虛之至故脉不來也之數者

皆由陰不足則陽有餘陽有餘則火盛而內
熱火與元氣不兩立火能消物造化自然也
惟甘也可以補元氣惟寒也可以除內熱熱
除矣元氣生矣則上來諸證自瘳故本經終
之以補虛益氣焉別錄去肺中水氣者卽十
劑中云燥可去溼桑白皮之屬是已吐衄熱
渴者熱傷肺火炎迫血妄行溢出上竅而兼
發熱作渴也其主水腫腹滿臚脹者卽利水

道除溼補虛之功也溼熱盛則寸白生消除
溼熱則蟲自不能留也縫金瘡者甘寒補益
宜於傷損也

主治參互

得天麥一冬款冬花百部薄荷甘草沙參貝
母枇杷葉五味子爲治嗽要藥 得芍藥薏
苡仁木瓜茯苓橘皮赤小豆爲治水腫之神
劑 經驗方治咳嗽吐血甚者鮮桑根白皮

一斤米泔浸三宿刮去黃皮剉細入糯米四兩焙乾為末每服一錢米飲下 肘後方治消渴尿多入地三尺桑根剝取白皮炙黃黑剉以水煮濃汁隨意飲之亦可少入米勿用鹽 肘後方治產後下血炙桑白皮煮水飲之 經驗方治墜馬拘損桑根白皮五斤為末以水五升煎膏敷之便止已後亦無宿血終不發動 子母秘方治小兒重舌桑根白

皮煮汁塗乳上飲之 聖惠方治小兒流涎脾熱也胸膈有痰新桑根白皮搗自然汁飲之甚效煎飲亦良 聖惠方治小兒天吊驚癇取家桑東行根研汁服 千金方治石癰堅硬不作膿者桑白皮陰乾為末烱膠和酒調傅以軟為度 蘇頌取皮中白汁主治小兒口瘡白漫拭淨塗之便愈又塗金刃所傷燦痛須臾血止仍以白皮裹之甚良 時珍

取汁塗蛇蜈蚣蜘蛛傷有驗 取枝燒瀝治
 大風瘡疥生眉髮 子母秘錄治小兒鵝口
 桑皮汁和胡粉塗之 聖惠方治小兒唇腫
 桑木汁塗之即愈 摘玄方治破傷中風桑
 瀝好酒對和溫服以醉為度醒服消風散

簡誤

肺虛無火 裹之而發咳嗽者勿服

○桑葉主除寒熱出汗汁解蜈蚣毒

疏○葉本經無氣味詳其主治應是味甘氣
 寒性無毒甘所以益血寒所以涼血甘寒相
 合故下氣而益陰是以能主陰虛寒熱及因
 內熱出汗其性兼燥故又能除脚氣水腫利
 大小腸原稟金氣故又能除風經霜則兼得
 天地之清肅故又能明目而止渴髮者血之
 餘也益血故又能長髮涼血故又止吐血合
 癰口罨穿掌療湯火皆清涼補血之功也

主治參互

四月採桑葉酒拌九蒸九曝為末胡麻或黑
 芝麻去殼九蒸九曝另磨如泥各等分煉蜜
 和為丸每五六錢空心饑時白湯下能益氣
 血祛風仙家餌之為引年止饑之要藥 普
 濟方治青盲洗法昔武勝軍宋仲孚患此二
 十年用此法二年日明如故摘青桑葉曬乾
 逐月按日就地上燒存性每以一合於甕器

內煎減二分傾出澄清溫熱洗目至百度屢
 試有驗正月初八二月初八三月初六四月
 初四五月初六六月初二七月初七八月二
 十九九月十二十月十三十一月初二十二
 月三十 集簡方治風眼下淚臘月不落桑
 葉煎湯日日溫洗或入芒硝 千金方治頭
 髮不長用桑葉麻葉煮泔水沐之七日可長
 數尺 聖濟總錄治吐血不止晚桑葉焙乾

研涼茶服三錢只一服止後用補肝肺藥
直指方治癰口不斂經霜黃桑葉為末傅之
通玄論治穿掌腫毒新桑葉研爛罨之即
愈 醫學正傳治湯火傷瘡經霜桑葉燒存
性為末油和敷之三日愈

○桑耳味甘有毒黑者主女子漏下赤白沃血
病癥瘕積聚陰痛陰陽寒熱無子療月水不
調其黃熟陳白者止久洩益氣不饑其金色

者治癖飲積聚腹痛金瘡 桑耳煨存性研
細香附童便炒黑研細每用桑耳灰二分香
附末三分淡醋湯空心調服治血崩奇效過
於他木耳

○桑椹味甘寒無毒單食止消渴陳藏器利五
藏關節通血氣久服不饑安魂鎮神令人聰
明變白不老多收暴乾為末蜜丸日服時珍
搗汁飲解中酒毒釀酒服利水氣消腫

一名文武

實

疏○桑椹者桑之精華所結也其味甘其氣寒其色初丹後紫味厚於氣合而論之甘寒益血而除熱其爲涼血補血益陰之藥無疑矣消渴由於內熱津液不足生津故止渴五臟皆屬陰益陰故利五臟陰不足則關節之血氣不通血生津滿陰氣長盛則不饑而血氣自通矣熱退陰生則肝心無火故魂安而

神自清寧神清則聰明內發陰復則變白不老甘寒除熱故解中酒毒性寒而下行利水故利水氣而消腫皆自然之道也

主治參互

寇宗奭曰本經言桑甚詳獨一烏椹然桑之精英盡在於此採摘微研以布濾汁石器熬成稀膏量入多少蜜熬稠貯瓷器中每抄一二錢食後夜臥以沸湯點服治服金石藥發

熱口渴生精神及小腸熱甚 僊方日乾為
 末蜜和丸酒服亦良 四時月令云四月宜
 飲桑椹酒能理百種風熱其法用桑椹汁三
 斗重湯煮至一斗半入白蜜二合酥油一兩
 生薑汁一合煮令得所瓶收每服一合和酒
 飲之亦可以汁熬燒酒藏之經年味愈佳
 普濟方治水腫脹滿水不下則滿溢水下則
 虛竭還脹十無一活宜用桑椹酒治之桑白

皮切以水二斗煮汁一斗入桑椹再煮取五
 升以糯米飯五升釀酒飲 保命集治癩癧
 結核文武膏用文武實即桑椹子二斗黑熟
 者以布取汁銀石器熬成膏每白湯調服一
 匙日三服 千金方治小兒赤禿桑椹子取
 汁頻服 聖濟錄治小兒白禿黑椹入罌中
 曝三七日化為水洗之三七日神效 集簡
 方治陰證腹痛桑椹絹包風乾過伏天為細

末每服三錢熱酒下取汗

簡誤

甘寒帶滑故潤而下行脾胃虛寒作泄者勿服

○桑柴灰味辛寒有小毒淋取汁與冬灰等分同滅痣疵黑子蝕惡肉煑赤小豆食大下水張傅金瘡止血生肌 桑霜即灰汁以桑皮綿紙襯淘羅底用滾水淋下甕器盛之重湯

煑乾別名木礪能鑽筋透骨為傳癰疽拔疔引諸散毒藥攻毒之要品 得丹砂雄黃乳香沒藥牛黃龍腦香紅白藥子白及白欵傅一切腫毒止痛追毒有奇效 得鐵鏞蟾酥可拔疔

○枝味苦平性不冷不熱主遍體風癢乾燥火氣脚氣風氣四肢拘攣上氣眼暈肺氣欬嗽消食利小便療癰疽後渴嫩條細搗一升熬

香煎飲亦無禁忌久服終身不患偏風 聖
惠方治紫白癩風桑枝十斤益母草三斤水
五斗慢煮至五升去滓再煎成膏每臥時溫
酒調服半合以愈爲度

○桑黃氣味與白皮同其除肺熱之功殆又過
之山家老桑樹多生湖桑少見 同天門冬
百部山梔枇杷葉治赤鼻有神

竹葉味辛平大寒無毒主胸中痰熱欬逆上氣
疏○竹葉稟陰氣以生本經味辛平氣大寒
無毒甄權言甘寒氣薄味厚陰中微陽降也
入足陽明手少陰經陽明客熱則胸中生痰
痰熱壅滯則欬逆上氣辛寒能解陽明之熱
結則痰自消氣自下而欬逆止矣仲景治傷
寒發熱大渴有竹葉石膏湯無非假其辛寒
散陽明之邪熱也

主治叅互

煎湯調酸棗仁炒熟末五錢臨臥服治心虛
 不得眠 同麥門冬酸棗仁遠志丹參茯苓
 丹砂犀角治心經蘊熱虛煩不眠 入白虎
 湯治傷寒煩熱大渴引飲 肘後方治時行
 發黃竹葉五升小麥七升石膏三兩水一斗
 半煮取七升細服盡劑愈

○淡竹茹味甘微寒無毒主嘔哕溫氣寒熱吐
 血崩中

疏○竹茹雖與竹葉同本然竹茹得土氣多
 故味帶甘氣微寒無毒入足陽明經經曰諸
 嘔吐酸水皆屬於熱陽明有熱則為嘔哕溫
 氣寒熱亦邪客陽明所致甘寒解陽明之熱
 則邪氣退而嘔哕止矣甘寒又能涼血清熱
 故主吐血崩中及女勞復也

主治參互

同木瓜橘皮麥門冬枇杷葉人參蘆根汁石

斛治胃虛有熱嘔哕不止 活人書治傷寒
愈後交接女勞復頭痛身熱耳鳴口渴腰骨
痛男子卵腫股痛竹皮一升水三升煮五沸
服汁 又方治婦人大病初愈有所動勞致
熱氣衝胸手足搐搦拘急如中風狀淡竹青
茹半斤活樓二兩水二升煎一升分二服

簡誤

胃寒嘔吐及感寒挾食作吐忌用

○淡竹瀝味甘大寒無毒療暴中風痺胸中大
熱止煩悶消渴勞復

疏○竹瀝竹之津液也經云大寒亦言其本
性耳得火之後寒氣應減性滑流利走竅逐
痰故為中風家要藥凡中風之證莫不由於
陰虛火旺煎熬津液結而為痰壅塞氣道不
得升降熱極生風以致猝然僵仆或偏痺不
仁此藥能遍走經絡搽剔一切痰結兼之甘

寒能益陰而除熱痰熱既祛則氣道通利經
脉流轉外證自除矣其主胸中大熱止煩悶
者取其甘寒清熱益陰之功耳觀古人以竹
瀝治中風則知中風未有不因陰虛痰熱所
致不然如果外來風邪安得復用此甘寒滑
利之藥治之哉

主治參互

同貝母栝樓仁霞天膏白芥子蘇子橘紅鬱

金童便麥門冬治似中風口眼喎斜語言寒
澀或半身不遂等證 千金方治中風口噤
竹瀝加薑汁日日飲之 梅師方治產後中
風口噤身直而青手足反張以竹瀝飲一二
升即甦 外臺秘要治破傷中風凡閃脫折
骨諸瘡慎不可當風用扇中風則發瘳口噤
項急殺人亟飲竹瀝二三升忌飲食及酒
千金方小兒傷寒淡竹瀝葛根汁各六合細

細與服 至寶方小兒狂語夜後便發竹瀝
 夜服二合 產寶方婦人胎動妊娠因夫所
 動困絕以竹瀝飲一升立愈 梅師方孕婦
 子煩茯苓二兩竹瀝一升水四升煎二升分
 三服 千金方時氣煩躁五六日不解青竹
 瀝半盞煎熟數飲之覆取微汗 李絳兵
 部手集欬嗽肺痿大人小兒欬逆短氣胸中
 吸吸欬出涕唾嗽出臭膿用淡竹瀝一合服
 之日三五次以愈為度

簡誤

寒痰溼痰及飲食生痰不宜用

吳茱萸味辛溫大熱有小毒主溫中下氣止痛
 欬逆寒熱除溼血痺逐風邪開腠理去痰冷腹
 內絞痛諸冷實不消中惡心腹痛逆氣利五藏
 疏○吳茱萸稟火氣以生故其味辛氣溫有
 小毒甄權辛苦大熱氣味俱厚陽也入足陽

明太陰兼入足少陰厥陰經凡脾胃之氣喜
溫而惡寒寒則中氣不能運化或爲冷實不
消或爲腹內絞痛或寒痰停積以致氣逆發
欬五臟不利辛溫煖脾胃而散寒邪則中自
溫氣自下而諸證悉除其主除溼血痺逐風
邪者蓋以風寒溼之邪多從脾胃而入脾胃
主肌肉爲邪所侵則腠理閉密而寒熱諸痺
所從來矣辛溫走散開發故能使風寒溼之
邪從腠理而出中惡腹痛亦邪惡之氣干犯
脾胃所致入脾散邪則腹痛自止矣

主治參互

仲景吳茱萸湯治少陰病吐利手足逆冷煩
躁欲死者吳茱萸一斤人參二兩生薑六兩
大棗十二枚劈四味以水七升煮二升去滓
溫服七合日三服厥陰乾嘔吐涎沫頭痛者
同此方 又當歸四逆加吳茱萸湯治厥陰

證手足厥冷脉細欲絕其人內有久寒者當
 歸三兩芍藥三兩炙甘草二兩通草二兩桂
 枝三兩細辛三兩生薑半斤吳茱萸二升大
 棗二十五枚以水六升清酒六升同煮取五
 升去滓分五服 食療治冬月感寒吳茱萸
 五錢煎湯服之取汗 聖惠方治陰毒傷寒
 四肢逆冷用吳茱萸一升酒拌溼絹袋二箇
 包蒸極熱更互厚心候氣透痛亦即止累

有效 附後方治寒疝往來吳茱萸一兩生
 薑半兩清酒一升煎分溫服 聖惠方治食
 已吞酸胃虛冷者吳茱萸湯泡七次焙乾薑
 等分爲末湯服一錢 孫氏存仁方治多年
 脾泄老人多此謂之水土同化吳茱萸三錢
 泡入水煎汁入鹽少許通口服蓋茱萸能煖
 膀胱水道既清大腸自固他藥雖熱不能分
 解清濁也 和劑局方戊巳丸治脾胃受溼

下痢赤白腹痛米穀不化用吳茱萸黃連白芍藥各一兩同炒爲末蒸餅丸梧子大每服二三十丸米飲下

簡誤

陽厥似陰手足雖逆冷而口多渴喜飲水大小便秘結小便或通亦赤澀短少此火極似水守真所謂禁慄如喪神守皆屬於火之謂耳此與桂附乾薑之類同忌嘔吐吞酸屬胃

火者不宜用欬逆上氣非風寒外邪及冷痰宿水所致不宜用腹痛屬血虛有火者不宜用赤白下痢病名滯下因暑邪入於腸胃而非酒食生冷停滯積垢者不宜用小腸疝氣非驟感寒邪及初發一二次者不宜用霍亂轉筋由於脾胃虛弱冒暑所致而非寒溼生冷干犯腸胃者不宜用一切陰虛之證及五臟六腑有熱無寒之人法所咸忌

檳榔味辛溫無毒主消穀逐水除痰癖殺三蟲
伏尸療寸白

疏○檳榔得天之陽氣地之金味故味辛氣
溫無毒大明言澀元素言苦以其感盛夏之
火氣耳氣薄味厚陽中微陰降也入手足陽
明經夫足陽明為水穀之海手陽明為傳道
之官二經相為貫輸以運化精微者也二經
病則水穀不能以時消化羈留而成痰癖或
溼熱停久則變生諸蟲此藥辛能散結破滯
苦能下泄殺蟲故主如上諸證也甄權宣利
五臟六腑壅滯破胸中氣下水腫治心痛積
聚日華子下一切氣通關節利九竅健脾調
中破癥結李珣主賁豚氣五膈氣風冷氣脚
氣宿食不消皆取其辛溫走散破氣墜積能
下腸胃有形之物耳

主治參互

司草果枳實橘皮治食瘧加三稜蓬茂礬紅
 紅麴山查麥蘖消一切堅硬肉食及諸米麩
 生冷食積成塊作痛 同黃連藕豆蓮肉橘
 紅白芍藥紅麴烏梅葛根枳殼治滯下後重
 同雷丸使君子白蕪荑蘆薈肉豆蔻胡黃
 連治小兒疳蚘 同棟根鶴蝮錫灰薏苡根
 貫眾烏梅治一切寸白蟲 同蒼朮草果青
 皮甘草治山嵐瘴氣發瘧 直指方心脾作

痛雞心檳榔高良薑各一錢半陳米百粒同
 以水煎服之 廣利方脚氣衝心悶亂不識
 人用白檳榔十二分爲末分二服空心煖小
 便調下日二服 十便良方蟲痔裏急檳榔
 爲末每日空心以白湯調二錢 千金方寸
 白蟲病檳榔二七枚爲末先以水二升半煮
 檳榔片取一升空心調末方寸七服之經日
 蟲盡出未盡再服以盡爲度

簡誤

檳榔性能墜諸氣至於下極病屬氣虛者忌之脾胃虛雖有積滯者不宜用下利非後重者不宜用心腹痛無畱結及非蟲攻咬者不宜用瘧非山嵐瘴氣者不宜用凡病屬陰陽兩虛中氣不足而非腸胃壅滯宿食脹滿者悉在所忌

梔子味苦寒大寒無毒主五內邪氣胃中熱氣

面赤酒皸鼓鼻白癩赤癩瘡瘍療目熱赤痛胸心大小腸大熱心中煩悶

疏○梔子感天之清氣得地之苦味故其性無毒氣薄而味厚氣浮而味沉陽中陰也入手太陰手少陰足陽明經少陰爲君主之官邪熱客之則五臟皆失所主清少陰之熱則五內邪氣自去胃中熱氣亦除面赤酒皸鼓鼻者肺熱之候也肺主清肅酒熱客之卽見

是證於開竅之所延及於面也肺得苦寒之氣則酒熱自除而面鼻赤色皆退矣其主赤白癩瘡瘍者卽諸痛痒瘡瘍皆屬心火之謂療目赤熱痛及胸心大小腸大熱心中煩悶者總除心肺二經之火熱也此藥味苦氣寒瀉一切有餘之火故能主如上諸證

主治叅互

仲景治傷寒汗吐下後虛煩不得眠及心中

懊懣者有梔子豉湯用梔子十四枚香豉四合水煎服 入茵陳大黃湯治傷寒溼熱發黃腹脹梔子十四枚茵陳六兩大黃三兩水一斗先煮茵陳減六升內二味煮取三升分三服小便當利尿如皂角汁狀正赤一宿腹減黃從小便出也 同甘草黃檗爲梔子檨皮湯亦治發黃身熱 同厚朴枳實爲梔子厚朴湯治傷寒下後心煩腹滿臥起不安者

得吐即愈 同鼠矢作湯治大病後勞復小
 便不利者小便利即愈已上皆仲景法 同
 連翹麥門冬竹葉燈心草生甘草黃連能瀉
 心經有餘之火加赤茯苓木通滑石澤瀉瀉
 小腸火 同桑黃或桑白皮黃芩甘草桔梗
 五味子乾葛治酒熱傷肺發出鼻齖 同茵
 陳蒿滑石車前子秦艽黃連連錢草苜蓿治
 酒熱發黃 梅師方治熱病後勞復及因交

接後發動欲死不能語者梔子三十枚水三
 升煎一升服令微汗 救急方治湯盪火傷
 梔子末和雞子清濃塗之 丹溪方治胃脘
 火痛山梔七枚炒水一盞煎七分入生薑汁
 飲之立止

簡誤

梔子稟至苦大寒之氣苦寒損胃而傷血凡
 脾胃虛弱者忌之血虛發熱者忌之性能瀉

有餘之火心肺無邪熱者不宜用小便不通
 由於膀胱虛無氣以化而非熱結小腸者不
 宜用瘡瘍因氣血虛不能收斂則為久冷敗
 瘡非溫煖補益之劑則不愈此所謂既潰之
 後一毫寒藥不可用是也世人又以治諸血
 證不知血得熱則行得寒則凝瘀血凝結於
 則反致寒熱或發熱勞嗽飲食減少為難
 治之病凡治吐血法當以順氣為先蓋血隨

氣而行氣降則火降火降則血自歸經不求
 其止而止矣此治療之要法不可違也

騏驎竭味甘鹹平有小毒主五藏邪氣帶下止

痛破積血金瘡生肉

舊與紫鉏同
條今分出

疏○騏驎竭稟土氣而兼水化故味甘鹹氣
 平無毒丹房鑑源云稟於熒惑之氣生於湯
 石之陰其色赤象火而味鹹則得陰氣也氣
 薄味厚陰也降也入足厥陰手少陰經甘主

補鹹主消散瘀血生新血之要藥故主破積
血金瘡止痛生肉主五臟邪氣者即邪熱氣
也帶下者溼熱傷血分所致也甘鹹能涼血
除熱故悉主之蘇恭主心腹卒痛李珣以之
治傷折打損一切疼痛血氣攪刺內傷血聚
者誠為此耳此藥產外國極難得真者理傷折有奪命之功

主治參石

同乳香沒藥自然銅麻皮灰狗頭骨煅存性

麝蟲黃荆子骨碎補治一切打撲損傷

髮灰乳香沒藥片腦輕粉象牙末紅粉霜為

細末摻一切金瘡及腫毒生肌止痛 廣利

方金瘡出血騏驎竭末傅之立愈 醫林集

要產後血衝心胸喘滿命在須臾用血竭沒

藥各一錢研童便和酒調服 究原方收斂

瘡口血竭末一字龍腦少許大棗燒灰半錢

同研津調塗之 摘玄方胸中血塊血竭沒

藥各一兩滑石牡丹皮各一兩同煮過為末
醋糊丸梧子大空心服之 醫林集要嵌甲
疼痛血竭末傅之

簡誤

凡使勿用海母血真相似只是味鹹并腥氣
騏驎竭味微鹹甘似梔子氣也又云嚼之不
爛如蠟者為上凡血病無瘀積者不必用日
華子云此藥性急不可久使却引膿用時勿
與眾藥同研化作飛塵也

龍腦香味辛苦微寒一云溫平無毒主心腹邪
氣風溼積聚耳聾明目去目赤膚翳

疏○龍腦香稟火金之氣以生本經味辛苦
氣微寒無毒其香為百藥之冠凡香氣之甚
者其性必溫熱李珣言溫元素言熱是矣氣
芳烈味大辛陽中之陽升也散也性善走竅
開竅無往不達芳香之氣能辟一切邪惡辛

熱之性能散一切風溼故主心腹邪氣及風溼積聚也耳聾者竅閉也開竅則耳自聰目赤膚翳者火熱甚也辛溫主散能引火熱之氣自外而出則目自明赤痛膚翳自去此從治之法也別錄又主婦人難產者取其善走開通關竅之力耳

主治參互

同乳香沒藥雄黃紅藥子烏雞骨白及白欒

桑礪城牛黃傳一切疔腫癰疽神效 聖濟

總錄目生膚翳龍腦為末日點三五度 御

醫院方頭目風熱上攻用龍腦末半兩南蓬

砂末一兩頻嚙兩鼻 瀕湖集簡方風熱喉

痺燈心一錢黃檗五分竝燒存性白礬七分

煨過片腦三分為末每以一二分吹患處此

陸一峰家傳絕妙方也 又方鼻中息肉垂

下者用片腦點之自入 夷堅志傷寒舌出

過寸者梅花片腦半分爲末摻之隨手而愈
 又方中風牙噤無門下藥者開關散指之
 五月五日午時用龍腦天南星等分爲末每
 以一字揩齒二三十遍其口自開 經驗方
 痘瘡狂躁心煩氣喘妄語或見鬼神瘡色赤
 未透者用龍腦一錢細研旋以猪心血丸芡
 子大每服一丸紫草湯下少時心神便定得
 睡發瘡 總微論用獷猪第二番血清半杯
 紫草汁半杯和勻入龍腦一分溫服良久下
 瘀血一二行瘡卽紅活此治痘瘡黑靨惡候
 醫所不治者百發百中

簡誤

宗奭云此物大通利關膈熱塞大人小兒風
 涎閉塞及暴得驚熱甚爲濟用然非常服之
 藥震亨云龍腦屬火世知其寒而通利未達
 其熱而輕浮飛越喜其香而貴重動輒與麝

同為桂附之助然人之陽易動陰易虧不可
不思杲曰龍腦入骨風病在骨髓者宜用之
為引經若風在血脉肌肉輒用腦麝反引風
入骨髓如油入麩莫之能出也觀三公之言
則龍腦之為害可知凡中風非外來之風邪
乃因氣血虛而病者忌之小兒吐瀉後成驚
者為慢脾風切不可服急驚屬實熱可用慢
驚屬虛寒不可用眼目昏暗屬肝腎虛者不

宜入點藥設誤點之必致昏暗難療

蕪荑味辛平無毒主五內邪氣散皮膚骨節中
淫淫溫行毒去三蟲化食逐寸白散腸中噎噎
喘息

疏○蕪荑稟金氣而生於春陽之令本經味
辛氣平無毒甄權加苦李珣加溫詳其功用
應是苦辛溫平之藥非辛溫則不能散五臟
皮膚骨節中邪毒氣非苦平則不能去三蟲

化食逐寸白療腸中噎噎喘息然察其所主
雖能除風淫邪氣之為害而其功則長於走
腸胃殺諸蟲消食積也故小兒疳瀉冷痢為
必資之藥

主治參互

同肉豆蔻胡黃連盧會使君子青黛五穀蟲
雷丸檳榔橘皮治小兒疳熱瀉痢及腹大羸

瘦面黃好喫泥土

本事方制殺諸蟲生

美生檳榔各四兩為末蒸餅丸如梧子每服
二十九白湯下 錢氏小兒直訣疳熱有蟲
瘦悴久服充肌用蕪荑一兩黃連一兩為末
猪膽汁七枚和入盃內飯上蒸之一日蒸一
次九蒸乃入麝香半錢湯浸蒸餅和丸菘豆
大每服五七丸至二十九米飲下 危氏得
效方蟲牙作痛以蕪荑仁安蛀孔中及縫中
甚效 入藥用大者小者即榆莢不堪入藥

除疴證殺蟲外他用甚稀故不著簡誤

枳殼味苦酸微寒無毒主風痒麻痺通利關節
勞氣欬嗽背膊悶倦散留結胸膈痰滯逐水消
脹滿大腸風安胃止風痛

疏○枳殼氣味所主與枳實大畧相同但枳
實形小其氣全其性烈故善下達如少年猛
悍之將勇往直前而一無回顧者也枳殼形

大其氣散其性緩故其行稍遲是以能入胸

膈肺胃之分及入大腸也其主風痒麻痺通
利關節止風痛者蓋肺主皮毛胃主肌肉風
寒溼入於二經則皮膚瘙痒或作痛或麻木
此藥有苦泄辛散之功兼能引諸風藥入於
二臟故為治風所需風邪既散則關節自然
通利矣其療勞氣咳嗽背膊悶倦者蓋亦指
風寒鬱於上焦則肺氣滯而為悶倦咳嗽經
曰肺苦氣上逆急食苦以泄之枳殼味苦能

泄至高之氣故主之也又肺與大腸為表裏
風邪入肺則并入大腸風熱相搏而為腸風
下血苦寒下泄之氣則血熱清而風自除矣
其主散留結胸膈痰滯逐水消脹滿安胃諸
證悉與枳實相同第其氣稍緩耳

主治參互

同蘇子橘皮桔梗木香白豆蔻香附治上焦
壅氣脹滿因於寒 同黃連槐花乾葛防風

荆芥芍藥黃芩當歸生地黃地榆側柏葉治
腸風下血初起者神效 同荆芥苦參防風
蒼耳草敗蒲煎湯沐浴治風疹作痒 同檳
榔芍藥黃連升麻葛根甘草紅麴滑石治滯
下裏急後重 得人參麥冬治氣虛大便不
快 同肉桂治右脇痛

簡誤

枳殼泄肺能損至高之氣肺氣虛弱者忌之

脾胃虛中氣不運而痰壅喘急者忌之咳嗽
不因於風寒入肺氣壅者服之反能作劇咳
嗽陰虛火炎者服之立致危殆一槩胎前產
後咸不宜服今世多用以治婦人胎氣不安
或至八九月爲易產之劑動輒資用殊不知
婦人懷孕全賴氣血以養胎氣血充足則胎
自易產且娠婦至八九月精神困倦四肢軟
弱飲食減少動息喘促何莫非虛弱之證而

更用此耗散之藥耶正經所謂損不足而虛
其虛豈不大謬哉古方有瘦胎飲者爲湖陽
公主而設以彼奉養太過其氣必實故用此
以耗其有餘之氣則胎易產今人不知古人
立方之意一概濫施誤甚誤甚

枳實味苦酸寒微寒無毒主大風在皮膚中如
麻豆苦痒除寒熱結止痢長肌肉利五藏益氣
輕身除胸脇痰癖逐停水破結實消脹滿心下

急痞痛逆氣脇風痛安胃氣止澹洩明目

疏○枳實感天地苦寒之氣以生故其味苦
氣寒無毒別錄雷公加酸甄權加辛察其功
用必是苦爲最而酸辛次之氣味俱厚陰也
入足陽明太陰經細詳神農主治與本藥氣
味大不相侔究其所因必是枳殼所主蓋二
物古文原同一條後人分出時誤入耳其別
錄所主除胸脇痰癖逐停水破結實消脹滿
心下急痞痛逆氣脇風痛安胃氣止澹洩者
是其本分內事皆足陽明太陰受病二經氣
滯則不能運化精微而痰癖停水結實脹滿
所自來矣胃之上口名曰賁門賁門與心相
連胃氣壅則心下亦自急痞痛邪塞中焦則
升降不舒而氣上逆肝木鬱於地下則不能
條達而脇痛得其破散衝走之力則諸證悉
除所以仲景下傷寒腹脹實結者有承氣湯

胸中痞痛者有陷胸湯潔古療心下痞滿者
有枳朮丸壅滯既去則胃氣自安而澹洩亦
止矣未云明目者經曰目得血而能視氣旺
乃能生血損氣破散之性豈能明目哉無是
理也

主治參互

同三稜蓬茂青皮檳榔為消磨堅積之劑然

須能食脾胃健者宜之 同白朮橘皮厚朴

甘草砂仁為枳朮丸治心下痞滿因於食

入陷胸湯治傷寒寒熱結胸 入大小承氣

湯治傷寒熱邪入裏結實脹滿痛不可當數

日不更衣者

簡誤

此藥性專消導破氣損真觀朱震亨云瀉痰
有衝墻倒壁之力其為勇悍之氣可知凡中
氣虛弱勞倦傷脾發為痞滿者當用補中益

氣湯補其不足則痞自除此法所當忌也脹滿非實邪結於中下焦手不可按七八日不更衣者必不可用挾熱下痢亦非燥糞畱結者必不可用傷食停積多因脾胃虛不能運化所致慎勿輕餌如元氣壯實有積滯者不得已用一二劑病已卽去之卽潔古所製枳朮丸亦爲脾胃有積滯者設積滯去則脾胃自健故謂之益脾胃之藥非消導之外復有補益之功也時醫不識病之虛實藥之補瀉往往概施損人真氣爲厲不淺設誤投之雖多服參耆補劑亦難挽其刻削之害也世人多蹈其弊故特表以爲戒

厚朴味苦溫大溫無毒主中風傷寒頭痛寒熱驚悸氣血痺死肌去三蟲溫中益氣消痰下氣療霍亂及腹痛脹滿胃中冷逆胸中嘔不止洩痢淋露除驚去畱熱心煩滿厚腸胃

疏○厚朴稟地二之氣以生兼得乎春陽之氣而成故其味苦其氣溫甄權苦辛大熱應是辛熱苦溫之藥辛熱太過則其性宜有毒以其得陽氣之正故無毒耳氣味俱厚陽中之陰降也入足太陰手足陽明經其主中風傷寒頭痛寒熱氣血痺死肌者蓋以風寒外邪傷於陽分則爲寒熱頭痛風寒溼入腠理則氣血凝澀而成痺甚則肌肉不仁此藥辛能散結苦能燥溼溫熱能祛風寒故悉主之也別錄又主溫中消痰下氣療霍亂及腹痛脹滿胃中冷逆胸中嘔不止洩痢心煩滿者何莫非腸胃氣逆壅滯及痰飲留結飲食生冷所致得此下洩開通溫熱煖胃則諸證不求其止而止矣至於淋露雖屬下焦爲病然多因胃家溼熱下流三蟲亦腸胃溼熱所生苦能燥溼殺蟲故亦主之也本經又主驚悸

及別錄除驚去留熱者皆非其所宜驚悸屬
心虛於脾胃絕無相干氣味大溫之藥又豈
能去留熱哉至益氣厚腸胃蓋亦指邪氣去
正氣自益之謂積滯消腸胃自厚之意耳非
消散之外復有補益之功也用者詳之

主治參互

同陳皮枳殼麥蘖草果山查砂仁礬紅治傷

食腹脹

同橘皮黃連甘草蒼白朮葛根治

溼熱作瀉

同檳榔木香黃連滑石橘皮甘

草白芍藥治滯下初起

同白朮人參白芍

藥茯苓消腹脹

佐生薑橘皮藿香砂仁半

夏止胃寒嘔吐

同三稜蓬茂檳榔人參青

皮治積年冷癖堅塊

同蒼朮橘皮甘草為

平胃散治胸中敦厚之氣使飲食倍增

聖

惠方治痰壅嘔逆心胸滿悶不下飲食用厚

朴一兩薑汁炙黃為末米飲調下二錢匕

張仲景金匱方治腹脹脉數厚朴三物湯用厚朴半斤枳實五枚以水一斗二升煎取五升入大黃四兩再煎取三升溫服一升轉動更服不動勿服 又七物厚朴湯治腹痛脹滿用厚朴半斤甘草大黃各三兩棗十枚枳實五枚桂二兩生薑五兩以水一斗煎取四升溫服八合日三嘔者加半夏五合

簡誤

厚朴氣味辛溫性復大熱其功長於泄結散滿溫煖脾胃一切飲食停積氣壅暴脹與夫冷氣逆氣積年冷氣入腹腸鳴虛吼痰飲吐沫胃冷嘔逆腹痛泄瀉及脾胃壯實之人偶感風寒氣實人誤服參耆致成喘脹誠為要藥然而性專消導散而不收畧無補益之功故凡嘔吐不因寒痰冷積而由於胃虛火氣炎上腹痛因於血虛脾陰不足而非停滯所

致洩瀉因於火熱暴注而非積寒傷冷腹滿
 因於中氣不足氣不歸元而非氣實壅滯中
 風由於陰虛火炎猝致僵仆而非西北真中
 寒邪傷寒發熱頭疼而無痞塞脹滿之候小
 兒吐瀉乳食將成慢驚大人氣虛血槁見發
 膈證老人脾虛不能運化偶有停積孕婦惡
 阻水穀不入娠婦胎升眩暈娠婦傷食停冷
 娠婦腹痛瀉利娠婦傷寒傷風產後血虛腹
 痛產後中滿作喘產後洩瀉反胃已上諸證
 法所咸忌若誤投之輕病變重重病必危世
 人不究其原一概濫用雖或一時未見其害
 而清純冲和之氣默為之耗矣可不慎哉
 茗苦茶茗味甘苦微寒無毒主瘦瘠利小便去
 痰熱渴令人少睡○苦茶主下氣消食
 疏○茗稟土中之清氣兼得春初生發之意
 本經味甘氣微寒無毒藏器言苦然亦有不

苦者氣薄味厚陰中微陽降也入手太陰少陰經太陰為清肅之臟喜涼而惡熱熱則生痰而津液竭故作渴也瘦瘡者大腸積熱也小便不利者小腸熱結也甘寒入心肺而除熱則津液生痰熱解臟氣既清腑病不求其止而止矣令人少睡者蓋心藏神神昏則多睡清心經之熱則神常自惺寂故不寐也下氣消食者若能下泄故氣下火降而兼滌除腸胃則食自消矣

主治參互

同黃連酸棗仁生用通草蓮實治多睡好眠
同當歸川芎烏梅黑豆生地黃土茯苓甘
菊花治頭痛因於血虛有火者 直指方熱
毒下痢蠟茶為末蜜水煎服白痢以薑汁同
水煎服兩三服即愈

簡誤

凡茶之種類極多方宜大凡嬰皆以味甘不
澀氣芬如蘭摘於夏前者爲良夫茶稟天地
至清之氣生於山谷礮瘠砂土之中不受纖
芥穢滓專感雲露之氣以爲滋培故能滌腸
胃一切垢膩寧非木中清貴之品哉昔人多
以其苦寒不利脾胃及多食發黃消瘦之說
此皆語其粗惡苦澀品類最下者言之耳昔
雅州蒙山出一種茶服四兩卽爲地僊豈有
味甘氣芬者飲之反致疾耶但苦澀野氣葉
痿莖枯非道地所產者服之不利心脾故不
宜飲酒後不宜用能成飲證

山茱萸味酸平微溫無毒主心下邪氣寒熱溫
中逐寒溼痺去三蟲腸胃風邪寒熱疝瘕頭風
風氣去來鼻塞目黃耳聾面皯溫中下氣出汗
強陰益精安五藏通九竅止小便利久服輕身
明目強力長年

疏○山茱萸感天地春生之氣兼得木之酸
味神農氣平別錄微溫總言其得春氣之正
耳岐伯甄權加辛然嘗其味必是酸多辛少
入足厥陰足少陰經陽中之陰降也其治心
下邪氣寒熱腸胃風邪寒熱頭風風氣去來
鼻塞面炮者皆肝腎二經所主二經虛熱故
見前證肝爲風木之位經曰諸風掉眩屬肝
木此藥溫能通行辛能走散酸能入肝而斂

虛熱風邪消散則心下腸胃寒熱自除頭目
亦清利而鼻塞面炮悉愈也逐寒溼痺者經
曰邪之所湊其氣必虛總藉其辛溫散結行
而能補也至於三蟲亦腸胃溼熱所生溼去
則蟲自除能溫中則氣自下汗自出矣凡四
時之令春氣煖而生秋氣涼而殺萬物之性
喜溫而惡寒人身精氣亦賴溫煖而後充足
况肝腎在下居至陰之位非得溫煖之氣則

孤陰無以生此藥正入二經氣溫而主補味酸而主斂故精氣益而陰強也精益則五臟自安九竅自利又腎與膀胱為表裏膀胱虛寒則小便不禁耳為腎之外竅腎虛則耳聾肝開竅於目肝虛則邪熱客之而目黃二經受寒邪則為疝瘕二臟得補則諸證無不瘳矣輕身強力長年者益精安五臟之驗也

主治參互

同菟絲子肉菴蓉巴戟天鹿茸牛膝白膠車前子枸杞子生地黃沙苑蒺藜麥門冬能添精固髓煖腰膝益陽道令人有子 同人參五味子牡蠣益智子治老人小便淋瀝及遺尿 同人乳沙苑蒺藜熟地黃人參麥門冬牛膝甘菊花治腦骨痛腦為髓之海髓足則腦痛自除 同石菖蒲甘菊花地黃黃檗五味子治腎虛耳聾 同杜仲牛膝地黃白膠

山藥治腎虛腰痛 入六味地黃丸為腎虛
而有溼熱者所須

簡誤

命門火熾強陽不痿者忌之膀胱熱結小便
不利者法當清利此藥味酸主斂不宜用陰
虛血熱不宜用即與黃檗同加

紫葳味酸微寒無毒主婦人產乳餘疾崩中癥
瘕血閉寒熱羸瘦養胎

疏○紫葳即凌霄花也稟春氣以生故其味
酸氣微寒無毒花開於夏而色赤味應帶苦
入肝行血之峻藥故主婦人產乳餘疾及崩
中癥瘕血閉寒熱羸瘦諸證至於養胎決非
其性所宜用者慎之

主治參互

同當歸紅花川芎牛膝地黃延胡索桃仁蘇
方木五靈脂治壯實婦人經閉 普濟方嬰

兒百日內無故口青不飲乳用凌霄花大藍
葉芒硝大黃等分為末以羊髓和丸梧子大
每研一丸乳送下便能喫乳熱者可服寒者
忌之

簡誤

紫葳長於破血消瘀凡婦人血氣虛者一概
勿施胎前斷不宜用

胡桐淚味鹹苦大寒無毒主大毒熱心腹煩滿
水和服之取吐又主牛馬急黃黑汗水研三二
兩灌之立瘥

疏○胡桐淚稟地中至陰之氣而兼水化故
味鹹苦氣大寒無毒氣味俱厚陰中之陰也
入足陽明經經曰熱淫於內治以鹹寒又曰
在高者因而越之苦以湧吐寒以勝熱故主
大毒熱心腹煩滿取吐而效也牛馬性熱而
又犯熱病所以急黃黑汗也鹹寒能除大熱

故亦主之日華子以之治風蟲牙齒痛李珣
謂其能治骨槽風齒墮元素言瘰癧非此不
能除皆資其苦能殺蟲鹹能入骨軟堅大寒
能除極熱之用耳

主治參互

聖惠方牙疼出血胡桐淚半兩研入麝香少
許夜夜貼之 又方牙疳宣露膿血臭氣者

胡桐淚一兩枸杞根一升每用五錢煎水熱

嗽 聖濟總錄牙齒蠹黑乃腎虛也胡桐淚

一兩丹砂半兩麝香一分為末摻之除口齒
藥外他用甚稀故不著簡誤

猪苓味甘苦平無毒主痰瘧解毒蠱疰不祥利
水道久服輕身耐老

疏○猪苓稟戊土之陽氣得風木之陰氣本
經謂其味甘應兼淡苦其氣平而無毒氣味
俱薄降也陽中陰也入足太陽足少陰經其

主痰瘧者瘧必由暑暑必兼溼淡以利竅引暑溼之氣從小便出所以分消之也淡滲之性故利水道溼勝則身重溼去則身輕利竅之藥必能走泄精氣其日久服耐老必無是理矣解蠱毒症不祥義將安出亦未可盡信也

主治參互

入五苓散為除溼之要藥 佐白芍藥白朮

苓人參橘皮朮澤瀉治水腫之屬陽分者

佐白芍藥生地黃桑寄生桑根白皮茯苓澤

瀉琥珀石斛薏苡仁肉桂治水腫之屬陰分

者均為要藥其功長於利水故善除溼

簡誤

寇宗奭曰猪苓利水之功多久服必損腎氣昏人目潔古曰淡滲太燥能亡津液無溼證勿服皆確論也有溼尚宜暫用久服斷乎不

可

烏藥味辛溫無毒主中惡心腹痛蠱毒疰忤鬼氣宿食不消天行疫瘴膀胱腎間冷氣攻衝背脊婦人血氣小兒腹中諸蟲

疏○烏藥稟地二之氣以生故味辛氣溫無毒然嘗其味亦帶微苦氣亦微香氣厚於味陽也入足陽明少陰經其主中惡心腹痛疰忤鬼氣天行疫瘴者皆足陽明受病陽明開

竅於口鼻凡邪惡鬼忤與夫疫瘴之氣侵入悉從口鼻而入此藥辛溫煖胃辟惡散邪故能主諸證也胃煖則宿食自消辛散則蠱毒亦解又腎與膀胱為表裏虛則寒客之而冷氣攻衝背脊辛溫能散寒邪其性又善下走則冷氣攻衝自止也性溫走泄故復能散婦人血凝氣滯微苦而辛故又能療小兒腹中諸蟲也

主治參互

同沉香木香白豆蔻香附橘皮檳榔治婦人
 氣實暴氣壅脹 濟生方治七情鬱結上氣
 喘急用四磨湯降中兼升瀉中帶補其方以
 人參烏藥沉香檳榔各磨濃汁七分煎細細
 嚥之 和劑局方烏沉湯治一切氣一切冷
 補五臟調中壯陽煖腰膝去邪氣冷風麻痺
 膀胱腎間冷氣攻衝背脊俛仰不利風水毒
 腫吐瀉轉筋癱瘓刺痛中惡心腹痛鬼氣瘧
 忤天行疫瘴婦人血氣痛用天台烏藥一百
 兩沉香五十兩人參三兩炙甘草四兩為末
 每服半錢薑鹽湯空心點服

簡誤

烏藥辛溫散氣病屬氣虛者忌之世人多以
 香附同用治女人一切氣病不知氣有虛有
 實有寒有熱冷氣暴氣用之固宜氣虛氣熱

用之能無貽害耶以故婦人月事先期小便短赤及咳嗽內熱口渴舌乾舌苦不得眠一切陰虛內熱之病皆不宜服

沒藥味苦平無毒主破血止痛療金瘡杖瘡諸惡瘡痔漏卒下血目中翳暈痛膚赤

疏○沒藥稟金水之氣以生故味苦平無毒然平應作辛氣應微寒氣薄味厚陰也降也入足厥陰經凡惡瘡痔漏皆因血熱瘀滯而

成外受金刃及杖傷作瘡亦皆血肉受病血肉傷則瘀而發熱作痛此藥苦能泄辛能散寒能除熱水屬陰血亦屬陰以類相從故能入血分散瘀血治血熱諸瘡及卒然下血證也肝開竅於目目得血而能視肝經血熱則目為赤痛膚翳散肝經之血熱則目病除矣

主治參互

同延胡索乳香乾漆鼈甲琥珀為末治產後

血暈有神效 加人參澤蘭生地益母草蘇
 木作湯送前藥治兒枕痛及惡露未盡腹痛
 寒熱等證立效 同乳香白及白欽紫花地
 丁半枝蓮夏枯草忍冬藤連翹甘菊貝母治
 一切癰疽疔腫 同乳香當歸牡丹皮牛膝
 續斷川芎番降香穿山甲治內傷胸脇骨痛
 入一切膏藥能消毒止痛長肉 御藥院

方筋骨損傷米粉四兩炒黃入沒藥乳香末

各半兩酒調成膏攤貼之 奇效良方金刃

所傷未透膜者乳香沒藥各一錢以童子小
 便半盞酒半盞溫化服之 圖經本草婦人
 腹痛內傷疔刺沒藥末一錢酒服便止又治
 婦人血暈方同 婦人良方產後惡血沒藥
 血竭末各一錢童便溫酒各半盞煎沸服良
 危氏得效方女人異疾月事退出皆作禽
 獸之形欲來傷人先將綿塞陰戶乃頓服沒

藥末一兩白湯調下即愈

簡誤

孕婦不宜服凡骨節痛與夫胸腹脇肋痛非
瘀血停留而因於血虛者不宜用產後惡露
去多腹中虛痛者不宜用癰疽已潰不宜用
目赤膚翳非血熱甚者不宜用大槩其功長
於通滯血血滯則氣亦壅氣血壅滯則經絡
滿急經絡滿急故發腫作痛打撲踉跌亦傷

經絡血分血氣不行故壅滯作腫痛也沒藥

善通壅滯之血血行則氣亦行氣血流通則
腫痛自止矣故為諸瘡癰及金瘡杖瘡跌撲
傷損腹中血結作痛之要藥而不主諸虛也
安息香味辛苦平無毒主心腹惡氣鬼疰

一疏○安息香稟火金之氣而有水故味辛苦
氣平而芬香性無毒氣厚味薄陽也入手少
陰經少陰主藏神神昏則邪惡鬼氣易侵芬

香通神明而辟諸邪故能主鬼疰惡氣也

主治參互

同鬼曰犀角牛黃丹砂乳香蘇合香龍齒雄黃麝香治鬼疰尸疰殺癘蟲寐魘暴亡及大人小兒卒中邪惡氣 奇效良方小兒驚邪安息香一豆許燒之自除

簡誤

病非關邪惡氣侵犯者不宜服

仙人杖味鹹平冷 無毒主噦氣嘔逆辟疰小

兒吐乳大人吐食並水煮服小兒驚癇及夜啼安身伴睡良又主痔病燒為末服方寸匕

疏○仙人杖此筍之將成竹時立死者得筍之氣已過稟竹之性未全故味鹹氣平無毒其功用在竹茹竹黃之間所主噦氣嘔逆小兒吐乳辟疰大人吐食痔瘡者竹茹之用也療小兒驚癇及夜啼者竹黃之用也雖其形

已痿而其性尚存故能療諸證也 又秘方
 用此蘸麻油於空室中燃之取滴下油塗癰
 疽已潰長肉如神他用甚稀故無主治簡誤
 海桐皮味苦平無毒主霍亂中惡赤白久痢除
 疽蠶疥癬牙齒蟲痛竝煮服及含之水浸洗目
 除膚赤

疏○海桐皮稟木中之陰氣以生木經味苦

氣平無毒然詳其用味應帶辛氣薄味厚陰

中陽也入足太陰陽明經二經虛則外邪易
 入為霍亂中惡辛以散之溼熱內侵為疔蠶
 久痢苦以泄之又脾胃主肌肉溼熱浸淫則
 生蟲而為疥癬苦能殺蟲平即微寒溼熱去
 而疥癬除矣其主漱齒洗目者亦取其苦寒
 殺蟲辛平散風熱之意耳李珣以之治腰脚
 不遂血脉頑痺腿膝疼痛之證其為辛苦之
 劑無疑矣

主治參互

續傳信方治腰膝痛不可忍用海桐皮二兩
牛膝芎藭羌活地骨皮五加皮各一兩甘草
半兩薏苡仁二兩生地黃十兩煎浸洗焙乾
剉細以綿包裹入無灰酒二斗浸之冬二七
日夏一七日空心飲一盞每日早午晚各飲
一盞長令醺醺合時不得添減禁毒食此藥

治因風溼溼熱流注下焦腰膝為病若因陰

虛血少火熾而得者勿服 同真川槿皮輕

粉蛇牀子山大黃為末傳癬瘡

簡誤

腰痛非風溼者不宜用

大腹微溫無毒主冷熱氣攻心腹大腸壅毒痰

膈醋心竝以薑鹽同煎入疏氣藥良

疏○大腹皮即檳榔皮也其氣味所主與檳

榔大畧相同第檳榔性烈破氣最捷腹皮性

緩下氣稍遲入足陽明太陰經二經虛則寒
熱不調逆氣攻走或痰滯中焦結成膈證或
溼熱鬱積酸味醋心辛溫煖胃豁痰通行下
氣則諸證除矣大腸壅毒以其辛散破氣而
走陽明故亦主之也

主治參互

同白朮茯苓車前子木瓜桑白皮五加皮猪

苓畢鳥意以仁蠶魚治水腫有效虛者加人

參
簡誤

鳩鳥多集檳榔樹上凡用檳榔皮宜先洗去
黑水復以酒洗後以大豆汁再洗過曬乾入
灰火煨用性與檳榔相似病涉虛弱者槩勿
施用

合歡味甘平無毒主安五藏利心志令人歡樂
無憂久服輕身明目得所欲

疏○合歡稟土氣以生故味甘氣平無毒入
手少陰足太陰經土為萬物之母主養五臟
心為君主之官木自調和脾虛則五臟不安
心氣躁急則遇事拂鬱多憂甘主益脾脾實
則五臟自安甘可以緩心氣舒緩則神明白
暢而歡樂無憂神明暢達則覺照圓通所欲
咸遂矣嵇叔夜養生論云合歡蠲忿正此之
謂歟其主輕身明目及大明主消癰疽續筋

骨者皆取其能補心脾生血脈之功耳

主治參互

與白蠟同入膏能長肌肉續筋骨甚捷 獨
行方肺癰唾濁心胸甲錯取夜合皮一掌大
水三升煎取一半分二服 百一選方撲損
折骨夜合樹皮去粗皮炒黑色四兩芥菜子
炒一兩為末每服二錢溫酒臥時服以滓外
傅接骨神妙 子合橘核木瓜牛膝能治疝

溼熱者加黃檗寒溼者加茴香子
氣味和平與病無忤故不著簡誤

五倍子味苦酸平無毒療齒宣疳匿肺藏風毒
流溢皮膚作風溼癬瘡瘙癢膿水五痔下血不
止小兒面鼻疳瘡

疏○五倍子得木氣而兼金水之性其味苦
酸澀氣平無毒氣薄味厚斂也陰也入手太
陰足陽明經木經主齒宣疳匿風溼癬瘡及

小兒面鼻疳瘡者皆從外治取其苦能殺蟲

酸平能斂浮熱性燥能主風溼瘡癢膿水五
痔下血者大腸積熱也大腸與肺為表裏肺
得斂肅則大腸亦自清寧也藏器療腸虛泄
利日華子主生津液消酒毒時珍謂其斂肺
降火化痰飲止咳嗽消渴盜汗斂潰瘡金瘡
收脫肛子腸墜下者悉假其入肺清金收斂
固脫之功耳

主治參互

五十九

同地骨皮小蘗皮硝甘草苦參葱頭煎湯洗
楊梅結毒 集靈方自汗盜汗用五倍子研
末津調填臍中縛定一夜卽止 化痰生津
噲化丸用五倍子安大鉢頭內用煮糯米粥
湯浸蓋好安靜處七日後常看待發芽黃金
色又出黑毛然後將箸試之若透內無硬卽
收入細瓦鉢中搗如醬連鉢日中曬至上皮

乾了又搗勻又曬曬至可丸方丸彈子大曬

乾收用其味甘酸能化一切膠痰 又方脾
泄久利五倍子炒半斤陳倉米炒一升丁香
細辛木香各三錢川椒五錢爲末每服一錢
蜜湯下日二服忌生冷魚肉 和劑局方玉
鎖丹治腎經虛損心氣不足思慮太過真陽
不固溺有餘瀝小便白濁如膏夢中頻遺盜
汗虛煩食減乏力此方性溫不熱極有神效

五倍子一斤白茯苓四兩龍骨二兩為末水
 糊丸梧子大每服七十九食前鹽湯送下日
 三服 百一選方臙毒下血五倍子不拘多
 少為末大鯽魚一枚去腸胃鱗腮填藥令滿
 入瓶內煨存性為末每服一錢溫酒下 直
 指方大腸痔疾五倍子煎湯薰洗或燒煙薰
 之自然收縮 三因方脫肛不收用五倍子
 末三錢入白礬少許水一碗煎湯洗之立效

婦人良方產後腸脫五倍子末摻之 博

濟方風毒攻眼腫癢澀痛不可忍者或上下
 臉赤爛或浮翳瘀肉侵睛神效驅風散五倍
 子一兩蔓荊子一兩半為末每用二錢水二
 盞銅石器內煎汁去滓乘熱洗大能明目去
 澀 楊子建護命方牙齦腫痛五倍子兩許
 瓦焙研末以半錢傅痛處片時唾去涎內服
 去風熱藥 端效方白口惡瘡狀似木耳不

拘大人小兒竝用五倍子青黛等分為末以筒吹之 儒門事親赴筵散治口舌生瘡五倍子蜜陀僧等分為末漿之漱過乾貼之院方加晚蠶蛾 杏林摘要魚口瘡毒初起未成膿者用五倍子炒黃研入百草霜等分以臘醋調塗患處一日一夜即消 拔萃方一切金瘡五倍子降真香等分炒研末傅之皮

肉自痊

簡誤

五倍子性燥急而專收斂咳嗽由於風寒外觸者忌之瀉利非腸虛脫者忌之咳嗽由於肺火實甚者忌之若誤服之反致壅塞喘滿以其酸斂太驟火氣無從泄越故耳 天竺黃味甘寒無毒主小兒驚風天吊鎮心明目去諸風熱療金瘡止血滋養五藏 疏○天竺黃竹之津氣結成其氣味功用與

竹瀝大同小異第竹黃氣微寒而性亦稍緩故為小兒家要藥入手少陰經小兒驚風天吊諸風熱者亦猶大人熱極生風之候也此藥能除熱養心豁痰利竅心家熱清而驚自平主君安而五臟咸得滋養故諸證悉除也明目療金瘡者總取其甘寒涼血清熱之功耳

主治參互

同牛黃犀角丹砂茯苓神琥珀酸棗仁遠志鈎

藤鈎治小兒驚癇癩疾有痰者加牛膽南星

貝母竹瀝屬虛者去南星加人參 錢一方

小兒驚熱天竺黃二錢雄黃牽牛末各一錢

研勻麩糊丸粟米大每服三五丸薄荷湯下

除小兒驚癇痰熱外無別用故不著簡誤

蜜蒙花味甘平微寒無毒主青盲膚翳赤澀多

眵淚消目中赤脉小兒麩豆及疳氣攻眼

疏○蜜蒙花稟土氣以生其莖萌於冬而開於春故氣平微寒味甘而無毒為厥陰肝家正藥觀本經所主無非肝虛有熱所致蓋肝開竅於目目得血而能視肝血虛則為青盲膚翳肝熱甚則為赤腫眵淚赤脈及小兒豆瘡餘毒疳氣攻眼此藥甘以補血寒以除熱肝血足而諸證無不愈矣好古謂其潤肝燥

相似但芫花狹小而蜜蒙花差大為異用者

宜詳辨之

主治參互

同空青木賊生地黃蟬蛻白蒺藜穀精草决明子羚羊角治青盲翳障 同甘菊花枸杞子生地黃白蒺藜穀精草治肝腎虛目不能遠視 同黃連赤芍藥防風荆芥穗黃檗甘菊花甘草龍膽草治風熱溼熱眼赤痛 同

胡黃連白蕪萸使君子蟬蛻木賊蘆會沿小
兒疳積眼目不明 療眼疾外無他用故不
著簡誤

神農本草經疏卷之十三

神農本草經疏卷之十四

木部下品

總九十九種今疏其要者二十九種

巴豆

蜀椒

皂莢

附子刺

訶黎勒

楝實

附根

椿木葉

附槲木

郁李仁

無食子

黃蘗根

雷丸

蘇方木

胡椒

南燭枝葉

橡實

石南

益智子

紫荊木

紫真檀

烏柏木

杉材

接骨木

樺木皮

木鼈子

番木
鼈附

釣藤

赤檉木

水楊葉

柞木皮

櫻櫚

木槿

巴豆味辛溫生溫熟寒有大毒主傷寒溫瘧寒

熱破癥瘕結聚堅積留飲痰癖大腹水脹蕩條

五藏六腑開通閉塞利水穀道去惡肉除鬼毒

蠱疰邪物殺蟲魚療女子月閉爛胎金瘡膿血

不利丈夫陰殺班猫毒可鍊餌之益血脈令人

色好變化與鬼神通

疏○巴豆生於盛夏六陽之令而成于秋金

之月故味辛氣溫得火烈剛猛之氣故其性

有大毒別錄言生溫熟寒恐熟亦不甚寒氣

薄味厚降也陽中陰也入手足陽明經其主

破癥瘕結聚堅積留飲痰癖大腹水腫鬼毒

蠱症邪物女人月閉者皆腸胃所治之位中
 有實邪留滯致生諸病故腸胃有病則五臟
 六腑閉塞不通此藥稟火性之急速兼辛溫
 之走散入腸胃而能蕩滌一切有形積滯之
 物則閉塞開水穀道利月事通而鬼毒蠱症
 邪物悉為之驅逐矣溫瘧者亦暑濕之氣入
 於腸胃也腸胃既清則溫瘧自止火能灼物
 故主爛胎及去惡肉性熱有大毒則必有損
 於陰故不利丈夫陰本經又主傷寒寒熱及
 別錄煉餌之法悉非所宜豈有辛熱大毒之
 物而能治傷寒寒熱及益血脈好顏色之理
 哉

主治參互

同白礬枯過去巴豆單用礬研細吹入喉中
 流出熱毒涎喉即寬治急喉痺如神 一味
 炒烟盡存性研膏治癰疽潰後腐肉不落傳

上卽拔毒去瘀生新 外臺秘要飛尸鬼擊

中惡心痛腹脹大便不通走馬湯用巴豆二

枚去皮心熬黃杏仁二枚以綿包椎碎熱湯

一合捻取白汁服之當下而愈量老少用之

瑣碎錄天絲入咽凡露地飲食有飛絲入

上食之令人咽喉生瘡急以白礬巴豆燒灰

吹入卽愈 經驗方耳卒聾閉巴豆一粒綿

裹針刺孔通氣寒之取効 普濟方一切惡

瘡有蟲者巴豆三十粒麻油煎黑去豆以油

調硫黃輕粉末頻塗取効 仲景三物白湯

治傷寒懊懣滿悶身無熱者爲寒結胃用桔

梗三分巴豆一分去皮心熬黑貝母三分二

味爲末內巴豆白中杵之以白湯和服強人

半錢弱者減之病在膈上必吐在膈下必利

不利進熱粥一杯利過不止進冷粥一杯

簡誤

元素曰巴豆乃斬關奪門之將不可輕用世以之治酒病膈氣以其辛熱能開通腸胃鬱結耳第鬱結雖開而血液隨亡真陰虧損從正曰傷寒風溫小兒痘瘡婦人產後用之下膈不死亦危奈何庸人畏大黃而不畏巴豆以其性熱而劑小耳豈知蠟置之猶能下後使人津液枯竭胃熱口燥耗却天真留毒不去他病轉生觀二公之言則巴豆之爲害昭

昭矣然而更有未盡者巴豆稟火烈之氣沾入肌肉無有不灼爛者試以少許輕擦完好之膚須臾卽發出一泡况腸胃柔脆之質下咽則徐徐而走且無論下後耗損真陰而腑臟被其熏灼能免無潰爛之患耶凡一槩湯散丸劑切勿輕投卽不得已急證欲借其開通道路之力亦須炒熟壓令油極淨入分許卽止不得多用

蜀椒味辛溫大熱有毒主邪氣欬逆溫中逐骨
節皮膚死肌寒濕痺痛下氣除六腑寒冷傷寒
溫瘧大風汗不出心腹留飲宿食腸澼下痢洩
精女子字乳餘疾散風邪瘕結水腫黃疸鬼疰
蠱毒殺蟲魚毒久服頭不白輕身增年開腠理
通血脉堅齒髮調關節耐寒暑可作膏藥多食
令人乏氣口閉者殺人

疏○蜀椒稟火金之氣得南方之陽受西方

之陰本經味辛氣溫別錄大熱有毒氣味俱
厚陽也入手足太陰兼入手厥陰經其主邪
氣欬逆皮膚死肌寒濕痺痛心腹留飲宿食
腸澼下痢黃疸水腫者皆脾肺二經受病肺
出氣主皮毛脾運化主肌肉肺虛則外邪客
之為欬逆上氣脾虛則不能運化水穀為留
飲宿食腸澼下利水腫黃疸二經俱受風寒
濕邪則為痛痺或成死肌或致傷寒溫瘧辛

溫能發汗開腠理則外邪從皮膚而出辛溫能煖腸胃散結滯則六腑之寒冷除腸胃得溫則中焦治而留飲宿食腸澼下利水腫黃疸諸證悉愈矣其主女子字乳餘疾者亦指風寒外侵生冷內停而言洩精瘕結由下焦虛寒所致此藥能入右腎命門補相火元陽則精自固而結瘕消矣瘵鬼疰蠱毒殺蟲魚毒者以其得陽氣之正能破一切幽暗陰毒之物也外邪散則關節調內病除則血脈通佐補陰涼血之藥則頭不白齒髮堅耐寒暑輕身增年所自來矣

主治參互

同女貞子牛膝地黃何首烏旱蓮草枸杞子
 沒食子桑椹子黃蘗人參南燭子能烏鬚黑
 髮悅色駐顏 空心單服能收輕粉水銀毒
 椒紅丸治元臟傷憊目暗耳聾服此百日

覺身輕少睡足有力是其効也服及三年心
 智爽悟目明倍常面色紅悅髭髮光黑用蜀
 椒去目及閉口者炒出汗曝乾搗取紅一斤
 以生地黃搗自然汁入砂器中煎至一升候
 稀稠得所和椒末九梧子大每空心煖酒下
 三十九合藥時勿令婦人鷄犬見 孫真人
 方心腹冷痛以布裏椒安痛處用熨斗熨令
 椒出汗即止 普濟方餐泄不化及久利小

椒一兩炒蒼朮二兩土炒研末醋糊丸梧子
 大每五十九米飲下 經驗方囊瘡痛痒紅

椒七粒葱頭七箇煎水洗之 大全良方寒

濕脚氣川椒二三升疎布囊盛之日以踏脚

入仲景烏梅丸治虵厥 宗奭方治盜汗

將椒目微炒研細用半錢以生猪上唇煎湯

一合睡時調服無不効 甄權方治腎虛耳

中如風水鳴或如鍾磬之聲卒暴聾者用椒

目巴豆菖蒲同研細以松脂黃蠟溶和為挺
納耳中抽之一日一易神驗 千金方水氣
腫滿椒目炒搗細每酒服方寸七

簡誤

椒稟純陽之氣乃除寒濕散風邪溫脾胃煖
命門之聖藥然而肺胃素有火熱或欬嗽生
痰或嘈雜醋心嘔吐酸水或大腸積熱下血
咸不宜用凡泄瀉瀉由於火熱暴注而非積寒

虛冷者忌之陰痿脚弱由於精血耗竭而非

命門火衰虛寒所致者不宜入下焦藥用欬
逆非風寒外邪壅塞者不宜用字乳餘疾由
於本氣自病者不宜用水腫黃疸因于脾虛
而無風濕邪氣者不宜用一切陰虛陽盛火
熱上衝頭目腫痛齒浮口瘡衄血耳聾咽痛
舌赤消渴肺痿咳嗽咯血吐血等證法所咸
忌

皂莢味辛鹹溫有小毒主風痺死肌邪氣風頭
淚出利九竅殺精物療腹脹滿消穀除欬嗽囊
結婦人胞不落明目益精可為沐藥

疏○皂莢稟木氣而兼火金之性故味辛微
鹹氣溫有小毒氣味俱厚浮而散陽也入足
厥陰手太陰陽明經厥陰為風木之臟其主
風痺死肌頭風淚出者皆厥陰風木為病得
金氣之厚者能勝木稟辛散之性者能利竅

木氣平關竅利則風邪散諸證除也關竅何
利則神明自通精物邪氣安得不去哉又厥
陰之脉循陰器而絡於肝厥陰客寒為囊結
辛溫散厥陰之寒則囊結解矣肺受風寒所
迫為欬嗽入肺散邪則咳嗽止矣鹹能軟堅
溫主通行辛能開竅橫走故又主腹脹滿消
穀及婦人胞不落也宣壅導滯之性而云益
精明目無是理矣

○子氣味與皂莢同炒春去赤皮以水浸軟煮
熟糖漬食之疎導五臟風熱壅滯及治大腸
虛秘瘰癧惡瘡腫毒

○刺功用與莢同第其銳利能直達瘡所爲癰
疽妬乳丁腫未潰之神藥蘇頌以米醋熬嫩
刺作煎塗癰瘡有奇効又治癘風惡瘡胎衣
不下殺蟲凡癰疽已潰不宜服孕婦亦忌之

主治參互

同真珠象牙末牛黃冰片白僵蠶滴乳石土

茯苓治蛙疔神効 孫用和稀涎散治中風
昏昏如醉形體不收或倒或不倒或口角流
涎斯須不治便成大病此證風涎潮於上胃
痺不通急宜吐之用大皂莢肥實不蛀者四
挺去黑皮白礬明者一兩爲末每用半錢重
者三字溫水調灌不大嘔吐只是微微稀冷
涎或出一升二升當待醒醒乃用藥調治不

可便大吐之恐過劑傷人累効不能盡述

聖惠方胷中痰結皂莢三十挺去皮切水五升浸一夜按取汁慢熬至可丸如梧子大每食後鹽漿水下十九 又釣痰膏用半夏醋煮過以皂角膏和勻入明礬少許以柿餅搗膏丸如彈子大噙之 千金方二使關格皂莢燒研粥飲下三錢立通宣明方鐵腳丸同千金方鼻不通皂角末吹之 十全方

風蟲牙痛猪牙皂莢角食鹽等分爲末

之 袖珍方便毒腫痛猪牙皂角七片煨黃去皮弦出火毒爲末空心溫酒服五錢婦人妬乳同 直指方便毒癰疽皂角一條醋熬膏傅之屢効 儒門事親便癰初起皂角子七枚研末水服効 阮氏經驗方年久癩癧用不蛀皂角子一百粒米醋一升蓬砂二錢同煮乾炒令酥看癧子多少如一箇服一粒

十箇服十粒細嚼米湯下酒浸煮服亦可一
云虛人不可用蓬砂 同蟬蛻白僵蠶杏仁

芭蕉根白毛藤土茯苓獨核肥皂仁白蘚皮
連翹薏苡仁葶藶漢防已治下疳廣瘡神効

同連翹白芷甘菊紫花地丁白及金銀花
甘草鼠粘子茜草地榆治下部癰疽腫毒

神仙傳崔言患大風惡疾雙目昏盲眉髮白
落鼻梁崩倒勢不可救遇異人傳方用皂角

刺三斤燒灰蒸一時久日乾為末食後濃煎

大黃湯調一七飲之一旬眉髮再生肌潤目

明

簡誤

皂莢利九竅疎導腸胃壅滯洗垢膩豁痰涎
散風邪暴病氣實者用之殊効第似中風
由於陰虛火炎煎熬津液結而為痰熱極生
風以致猝然仆蹶世人多以稀涎散吐之損

其不足竭其津液津液愈耗則經絡無以榮
養為拘攣偏廢之證矣法所最忌也孕婦忌
服

訶黎勒味苦溫無毒主冷氣心腹脹滿下食

疏○訶黎勒其味苦澇其氣溫而無毒苦所
以洩澇所以收溫所以通惟斂故能主冷氣
心腹脹滿惟溫故能下食甄權用以止水道
蕭炳用以止腸澼久洩蘇頌用以療腸風瀉

血帶下朱震亨用以實大腸無非苦澇收斂

治標之功也

主治參互

得人參治肺虛受寒喘嗽 得橘皮砂仁主

冷氣入內心腹脹滿及因寒食不下 得益

智止氣虛寒小水不禁 佐樗根白皮止腸

澼瀉血 佐白朮蓮實止久洩因於虛寒

同蛇牀子五味子山茱萸杜仲續斷止虛寒

帶下 同人參肉苳菟則實大腸

簡誤

訶子性溫而味澹澹主斂不主散故咳嗽因於肺有實熱泄瀉因於濕熱所致氣喘因於火逆衝上帶下因於虛熱而不因於虛寒及腸澼初發濕熱正盛小便不禁因於腎家虛火法竝忌之至於滯下必本濕熱喘嗽實由肺火用之立致殺人不可不深戒也東垣謂

苦重瀉氣酸輕不能補肺故嗽藥中不用亦此意耳

棟實味苦寒有小毒主溫疾傷寒大熱煩狂殺三蟲疥瘍利小便水道根微寒療虻蟲利大腸

即金餘子

疏○棟實稟天之陰氣得地之苦味故其味苦氣寒極苦而寒故其性有小毒氣薄味厚陰也降也入足陽明手足太陰經經曰冬傷

於寒春必病溫其主溫疾傷寒大熱煩狂者
總因寒邪鬱久至春變為溫病邪在陽明也
苦寒能散陽明之邪熱則諸證自除膀胱為
州都之官小腸為受盛之官二經熱結則小
便不利此藥味苦氣寒走二經而導熱結則
水道利矣濕熱鬱積則內生諸蟲濕熱浸淫
則外為疥瘍得大寒極苦之物則濕熱散故
能療諸蟲及疥瘍也根氣味相同故亦主殺

蟲利大腸耳

主治參互

同牛膝木瓜橘核荔枝核杜仲巴戟天烏攬
樹子藁香治腎虛疝氣 澹寮方棟實丸治
癰疔腫痛或鈎腎偏墜痛不可忍用川棟子
肉五兩分作五分一分用破故紙二錢炒黃
一分用小茴香三錢食鹽半錢同炒一分用
班蝥七枚去頭足同炒一分用萊菔子一錢

同炒一分用牽牛子三錢同炒炒完揀去食
 鹽萊菔子牽牛班蝥只留故紙茴香同研為
 末以酒打麵糊丸梧子大每五十九空心酒
 下 根同白蕪荑檳榔鶴蝨黃連牽牛雷丸
 使君子錫灰烏梅蘆會殺腸胃一切蟲 集
 簡方治小兒虻蟲棟根皮同雞卵煮熟空心
 服之次日蟲下

簡誤

脾胃虛寒者不宜用

椿木葉味苦有毒主洗瘡疥風疽皮上甘蜜栲

木根葉尤良

雷公云凡使椿根不近西頭者為上探出拌生葱蒸半日剉細以袋

盛掛屋南陰乾用

疏○椿稟地中之陰氣以生本經味苦有毒
 甄權言微熱震亨言涼而燥然考其用必是
 微寒苦燥之藥入手足陽明經本經主甘蜜
 及洗疥瘡風疽藏器去口鼻疔蟲疥蠶者因

腸胃有濕熱故現是證苦涼而燥所以外治
皆得也藏器又主殺虵蟲蠱毒下血及赤白
久痢日華子主腸風瀉血蕭炳云得地榆主
疳痢孟詵云止女子血崩及產後血不止赤
帶皆取其苦能燥濕寒能除熱瀉能收斂之
功耳採得去粗皮蜜炙用

樗功用相同

主治參互

存仁方下血經年樗根白皮三錢水一盞煎
七分入酒半盞服 外臺秘要小兒疳痢困

重者用樗根白皮搗粉以水和棗作大饅飩
子日曬少時又搗如此三遍以水煮熱空腹
吞七枚重者不過七服愈 子母秘錄小兒
疳疾椿根白皮日乾二兩爲末以粟米淘淨
研濃汁和丸梧子大十歲兒三四丸米飲下
量大小加減仍以一丸納竹筩中吹入鼻內
三度良 經驗方下利清血腹中刺痛椿根

白皮洗刮曬研醋糊丸梧子大空心米飲下
 三四十九 婦人良方產後腸脫不能收拾
 者樗根取皮焙乾一握水五升連根葱五莖
 漢椒一撮同煎至三升去渣傾盆內乘熱熏
 洗冷則再熱一服可作五次用洗後睡少時
 忌鹽酢醬麵發風毒物及用心勞力等事
 丹溪方女人白帶椿根白皮滑石等分爲末
 粥丸梧子大空腹白湯下一百丸 寇宗奭

云洛陽一女子年四十六七耽飲無度多食
 魚蟹畜毒在臟日夜二三十瀉大便與膿血
 雜下大腸連肛門痛不堪忍醫以止血痢藥
 不効又以蕩風藥則益甚蓋腸風則有血無
 膿如此半年氣血漸弱食減肌瘦服熱藥則
 腹愈痛血愈下服冷藥則注泄食減服溫平
 藥則病不知如此期年垂命待盡或人教服
 人參散一服知二服減三服膿血皆定遂常

服之而愈其方治大腸風虛飲酒過度挾熱
下痢膿血痛甚多日不瘥用栲根白皮一兩
人參一兩為末每服二錢空心米飲調服忌
油膩濕麵青菜菓子甜物雞猪魚羊蒜薤等

簡誤

脾胃虛寒者不可用崩帶屬腎家真陰虛者
亦忌之以其徒燥故也凡滯下積氣未盡者
亦不宜遽用不入湯煎

郁李仁味酸平無毒主大腹水腫面目四肢浮

腫利小便水道

疏○郁李仁得木氣而兼金化本經味酸氣
平無毒元素言辛苦性潤而降下陰也入足
太陰手陽明太陽經其主大腹水腫面目四
肢浮腫者經曰諸濕腫滿皆屬脾土又曰諸
腹脹大皆屬於熱脾虛而濕熱客之則小腸
不利水氣泛溢於面目四肢辛苦能潤熱結

降下善導癰閉小便利則水氣悉從之而出
矣甄權主腸中結氣關格不通日華子云泄
五臟膀胱結痛宣腰膝冷膿消宿食下氣元
素云破血潤燥李杲云專治大腸氣滯燥澹
不通均得之矣

主治參互

同當歸地黃麻仁麥門冬桃仁生蜜肉蓯蓉

治大便秘燥結不通甚者加大黃楊氏產乳

腫滿氣急不得臥用郁李仁一大合搗和麵

作餅喫入口卽大便通泄氣便愈

簡誤

郁李仁性專降下善導大腸燥結利周身水
氣然而下後多令人津液虧損燥結愈甚乃
治標救急之藥津液不足者慎勿輕用

無食子味苦溫無毒主赤白痢腸滑生肌肉

疏○無食子稟春生之氣兼得西北金水之

性故味苦氣溫無毒金主斂肅大腸屬金以類相從故主赤白痢腸滑春為發生之令溫能和脾胃養腠理故主生肌肉水為潤下色黑而象腎故李珣以之益血生精和氣安神烏髭髮治陰痿諸證也得溫煖之氣復兼收斂之性故為固瀦精氣之要藥雷公云凡使盆中研令盡焙乾再研如烏犀色入藥

主治參互

同蓮鬚女貞子枸杞子地黃南燭子何首烏

黃精旱蓮草木人參為烏鬚髮之勝藥 同

覆盆子牡蠣枸杞子五味子車前子地黃蓮

鬚龍骨鹿茸沙苑蒺藜魚膠砂仁黃蘗能

補益精氣治一切夢遺洩精 仲景方治陰

汗用無食子燒灰先以湯浴了布裹灰撲之

甚良 宮氣方小兒久痢沒食子二箇熬黃

研末作餛飩食之 聖濟總錄牙齒疼痛綿

裹無食子末一錢咬之涎出吐去 聖惠方
大小口瘡沒食子炮三分甘草一分研末摻
之月內小兒生者少許置乳上吮之入口卽
啼不過三次 奇効方足趾肉刺無食子三
枚肥皂莢一挺燒存性爲末醋和傅之立効

簡誤

赤白痢由於濕熱鬱於腸胃兼積滯多者不
宜用

黃藥根味苦平無毒主諸惡腫瘡癩喉痺蛇犬
咬毒研水服之亦含亦塗

疏○黃藥根得土中至陰之氣以生故其色
黃味苦氣平無毒平卽兼涼日華子加涼是
矣氣薄味厚降多升少陰也入手少陰足厥
陰經諸惡腫瘡癩皆榮氣不從逆於肉裏所
致蓋榮主血肝心又主血藏血之臟二經得
苦涼之氣則血熱解榮氣和標證不求其止

而止矣經曰一陰一陽結為喉痺一陰者少陰君火也一陽者少陽相火也解少陰之熱相火自不妄動而喉痺瘳矣蛇犬咬毒亦血分受熱毒所傷故也苦寒能涼血得上氣之厚者又能解百毒也日華子以之療馬病蓋馬性多熱亦取其苦寒除熱之義耳

主治參互

同忍冬藤夏枯草白及白欽紫花地丁甘菊

茜草連翹牛旁子白芷貝母白藥子之屬治一切疔腫癰疽本經并載赤藥俗名紅藥子予嘗得一方以之為君每四兩加白及白欽各一兩乳香沒藥各五錢丹砂雄黃各三錢麝香龍腦香各一錢為細末量瘡大小蜜調敷瘡四圍中畱大孔以綿紙護之時時以米醋潤之其痛即減亦復易潰易收治一切發背癰疽俱神効陰毒尤要如無赤藥子以黃

藥子代之 孫思邈千金月令方療忽生癰
 疾以萬州黃藥子半斤須緊重者為上如輕
 虛卽是他州者力慢須用加倍取無灰酒一
 斗投藥入中固濟瓶口以糠火燒一伏時待
 酒冷乃開時時飲一杯不令絕酒氣經三五
 日後常把鏡自照覺消卽停飲不爾便令人
 項細也 聖惠方治吐血不止黃藥子一兩
 水煎服 簡要濟眾方治鼻衄不止黃藥子

為末每服二錢煎薄膠湯下良久以新水調
 麵一匙頭服之 禹講師經驗方產後血暈
 惡物冲心四肢冰冷唇青腹脹昏迷紅藥子
 一兩頭紅花二錢水二盞婦人油釵二隻同
 煎一盞服大小便俱利血自下也

簡誤

癰疽已潰不宜服癰疽發時不炊腫不渴色
 淡脾胃作泄者此為陰證當以內補為急解

毒次之藥子之類宜少服止可外敷

雷丸味苦鹹寒微寒有小毒主殺三蟲逐毒氣
胃中熱利丈夫不利女子作摩膏除小兒百病
逐邪氣惡風汗出除皮中熱結積蠱毒白蟲寸
白自出不止久服令人陰痿

疏○雷丸稟竹之餘氣兼得地中陰水之氣
以生本經味苦氣寒別錄加鹹有小毒黃帝
岐伯桐君扁鵲云甘詳其所主應是苦鹹爲

勝氣薄味厚陰也降也入手足陽明經其主
殺三蟲白蟲寸白自出者腸胃濕熱甚也逐
毒氣胃中熱邪氣惡風汗出皮中熱結積者
腸胃邪熱盛也苦寒能除二經濕熱邪氣則
上來諸證自除作摩膏治小兒百病者以小
兒好食甘肥腸胃類多濕熱蟲積苦能殺蟲
除濕鹹寒能清熱消積故主之也凡蠱毒必
熱必辛苦寒能除辛熱故又主解蠱毒也利

丈夫不利女子者蓋以男子屬陽得陰而生故喜陰寒之味女子屬陰得陽而長故不利陰寒之物也別錄又云久服令人陰痿正見其過於苦寒偏至之氣能令陽道痿也

主治互

同蕪荑使君子蘆會五穀蟲胡黃連青黛治小兒疳積有神 同檳榔鶴蝨棟根貫眾牽牛錫 意苡根殺腸胃一切蟲 經驗方下

寸白蟲雷丸水浸去皮切焙為末五更初食炙肉少許以稀粥飲服一錢七須上半月服蟲乃下 除殺蟲外他用甚稀故不著簡誤惟赤色者能殺人用時細擇去之

蘇方木味甘鹹平無毒主破血產後血脹悶欲死者水煮苦酒煮五兩取濃汁服之効

疏○蘇方木稟水土之氣以生故其味甘鹹氣平無毒好古加辛降多於升陽中陰也入

足厥陰兼入手少陰足陽明經凡積血與夫
產後血脹悶欲死無非心肝二經爲病此藥
鹹主入血辛能走散敗濁瘀積之血行則二
經清寧而諸證自愈日華子主婦人血氣心
腹痛月候不調及蓐勞排膿止痛消癰腫撲
損瘀血女人失音血噤海藥主虛勞血癖氣
壅滯產後惡露不盡心腹攪痛及經絡不通
悉取其入血行血辛鹹消散亦兼有軟堅潤
下之功故能祛一切凝滯留結之血婦人產
後尤爲所須耳

主治參互

同澤蘭川芎麥門冬生地黃蒲黃人參童便
益母草牛膝黑豆荆芥穗治產後血暈有神
同山查延胡索牡丹皮澤蘭當歸五靈脂
赤芍藥紅花治產後兒枕作痛加入乳香沒
藥治產後血癖不消因寒而得者加炒黑乾

薑桂各少許 同延胡索牡丹皮 午膝當歸
地黃芍藥續斷治婦人月候不 煎濃汁加
入乳香沒藥血竭自然銅麝香 皮灰黃荆
子等末量病輕重調服四五錢治跌撲損傷
如神 胡氏方產後氣喘面黑欲死乃血入
肺也用蘇木二兩水二碗煮一碗入人參末
五錢服隨時加減神効不可言名參蘇飲

簡誤

產後惡露已盡由血虛腹痛者不宜用

胡椒味辛大溫無毒主下氣溫中去痰除臟腑
中風冷

疏○胡椒稟天地純陽之氣以生故其味辛
氣大溫性雖無毒然辛溫太甚過服未免有
害氣味俱厚陽中之陽也入手足陽明經其
主下氣溫中去痰除臟腑中風冷者總因腸
胃爲寒冷所乘以致臟腑不調痰氣逆上辛

溫煖腸胃而散風冷則痰氣降臟腑和諸證悉瘳矣

主治參互

食療治心腹冷痛胡椒三七枚清酒吞之
衛生易簡方夏月冷瀉及霍亂用胡椒碾細
飯丸梧子大每米飲下四十九

簡誤

胡椒辛溫大熱純陽之藥也凡胃冷嘔逆宿

食不消或霍亂氣逆心腹冷痛或大腸虛寒
完穀不化或寒痰冷積四體如水兼殺一切
魚肉蠶蕈等毒誠為要品然而血分有熱與
夫陰虛發熱咳嗽吐血咽乾口渴熱氣暴衝
目昏口臭齒浮鼻衄腸風臟毒痔漏洩瀝等
證切勿輕餌誤服之能令諸病即時作劇慎
之慎之

南燭枝葉味苦平無毒止泄除睡強筋益氣久

服輕身長年令人不饑變白去老取莖葉搗碎
漬汁浸粳米九浸九蒸九暴米粒緊小正黑如
鑿珠袋盛之可適遠方日進一合不饑益顏色
堅筋骨能行取汁炊飯名烏飯亦名烏草亦名
牛筋言食之健如牛筋也

疏○南燭稟春升之氣以生本經言其味苦
氣平性無毒然嘗其味亦多帶微瀼其氣平
者平卽涼也人心脾腎三經之藥十劑云瀼

可去脫非其味帶瀼則不能上泄非其氣本
涼則不能變白髮者血之餘也顏色者血之
華也血熱則鬢髮早白而顏枯槁脾弱則困
倦嗜臥而氣力不長腎虛則筋骨軟弱而行
步不前入心涼血入脾益氣入腎添精其云
輕身長年令人不饑者非虛語矣凡變白之
藥多是氣味苦寒有妨脾胃惟南燭氣味和
平兼能益脾爲修真家所須 子味甘酸其

功效尤勝枝葉真變白駐顏輕身却老之良藥也牧童食之輒止饑渴亦一驗矣

主治參互

孫思邈千金月令方南燭煎益髭髮及容顏兼補暖三月三日采葉并蓋子入大淨瓶中以童子小便浸滿瓶固濟其口置閒處經一周年取開每用一匙溫酒調服極有效驗同旱蓮草沒食子地黃桑椹枸杞山茱萸何

首烏白蒺藜為烏鬚髮之聖藥 氣味和平

性復無毒除變白外無他用故不著簡誤

椽實味苦微溫無毒主下痢厚腸胃肥健人其殼為散及煮汁服亦主痢并堪染用

疏○椽實感天地微陽之氣兼得秋時收斂之性故其味苦氣微溫性無毒氣薄味厚陽中陰也入手足陽明足太陰少陰經夫脾胃為五臟根本一身之最要喜溫暖而惡寒濕

寒濕則違其性故宜急食苦以燥之此藥味苦能除其所惡氣溫能遂其所喜故主厚腸胃肥健人也得收斂之性故又主下痢及日華子瀉腸止瀉諸治兼能瀉精煖食復能止饑禦歉歲 穀氣味與實相同而瀉則過於實故亦主下痢并堪染皂也

主治參互

聖惠方水穀下痢日夜百餘行者橡實二兩

楮葉炙一兩為末每服一錢食前烏梅湯調

下 直指方下痢脫肛橡斗子燒存性研末

猪脂和傅

簡誤

濕熱作痢者不宜用

石南味辛苦平有毒主養腎氣內傷陰衰利筋骨皮毛療腳弱五藏邪氣除熱女子不可久服
令思男

疏○石南得火金之氣故其味辛苦氣平有
 毒然觀其用當是金勝火微其性應云有小
 毒可升可降陰中陽也入足厥陰足少陰經
 少陰屬水得金氣之厚者能生水故主養腎
 氣又腎為陰中之陰肝為陰中之陽二經俱
 在下而主筋骨二經得所養則內傷陰衰自
 筋骨皮毛自利而脚弱自健也濕熱之邪
 留滯五臟則筋骨皮毛氣血皆為之病矣邪
 熱散則諸病自瘳女子久服思男者以其補
 腎氣助陽火耳

主治參互

同巴戟天肉蓯蓉瑣陽鹿茸枸杞子山茱萸
 治腎經虛寒精滑精冷 同白蒺藜桑葉何
 首烏淫羊藿巴戟天五加皮兔絲子威靈仙
 虎骨治肝腎為風寒濕所乘以致痺弱不能
 行動

簡誤

腎虛而陽道數舉者不宜用脚弱由於肝腎虛而不由於風寒濕客下部者不宜用

益智子味辛溫無毒主遺精虛漏小便餘瀝益氣安神補不足安三焦調諸氣夜多小便者取二十四枚碎入鹽同煎服有奇驗

疏○益智子仁得火土金之氣故其味辛其氣溫其性無毒入足太陰足少陰經惟辛故所以散結惟溫故所以通行其氣芳香故主入脾其稟火土與金故燥而收斂以其斂攝故治遺精虛漏及小便餘瀝此皆腎氣不固之證也腎主納氣虛則不能納矣又主五液涎乃脾之所統脾腎氣虛二臟失職是腎不能納脾不能攝故主氣逆上浮涎穢泛濫而上溢也斂攝脾腎之氣則逆氣歸元涎穢下行宜東垣用以治客寒犯胃和中益氣及人

多唾王好古謂益智本脾家藥主君相二火
故用以益脾胃理元氣補腎虛滑瀝劉河間
又謂益智辛熱能開發鬱結使氣宣通皆以
其香可入脾開鬱辛能散結復能潤下於開
通結滯之中復有收斂之義故也

主治參五

益智在集香丸則入肺在四君子湯則入脾
在大鳳髓丹則入腎當於補藥中兼用不宜

多服 佐人參茯苓半夏橘皮車前子則攝
涎穢立効 同藿香蘇子橘皮枇杷葉木瓜
止逆氣上壅 同五味子山茱萸炒鹽人參
治小便頻數淋瀝 同人參乾薑橘皮藿香
治因寒犯胃作嘔吐

簡誤

益智乃脾腎二經之藥其用專在脾所以亦
能入腎者辛以潤之之故也然其氣芳香性

本溫熱證屬燥熱病人有火者皆當忌之故
凡嘔吐由於熱而不因於寒氣逆由於怒而
不由於虛小便餘瀝由於水涸精虧內熱而
不由於腎氣虛寒泄瀉由於濕火暴注而不
由於氣虛腸滑法竝忌之

紫荆木味苦平無毒主破宿血下五淋濃煮服
之

疏○紫荆木皮內稟天地清寒之性外感南

方初陽之氣故其味苦氣平花水色皆紫藏
器言寒無毒入足厥陰經血分寒勝熱苦泄
結紫入榮故能活血破血消腫毒下五淋也
花梗氣味功用竝同

主治參互

仙傳外科發背初生一切癰疽皆治單用紫
荆皮為末酒調籬住自然撮小不開內服柞
木飲子乃救貧良劑也并可內服 楊清叟

仙傳方冲和膏治一切癰疽發背流注諸腫
毒用紫荊皮三兩炒獨活炒三兩赤芍藥炒
二兩生白朮一兩木蠟炒一兩為末用葱湯
調熱敷血得熱則行葱能散氣也瘡不甚熱
者酒調之痛甚者加乳香 除癰毒外他用
甚稀故無簡誤

紫真檀味鹹微寒主惡毒風毒

疏○紫真檀稟水氣以生故其味鹹氣微寒
性應無毒氣味俱厚陽中陰也入足厥陰經
其主惡毒風毒者凡毒必因熱而發熱甚則
生風而榮血受傷毒乃生焉此藥鹹能入血
寒能除熱則毒自消矣弘景以之傅金瘡止
血止痛者亦取此意耳宜與番降真香同為
極細末傅金瘡良

烏柏木根皮味苦微溫有毒主暴水癥結積聚
疏○烏柏木根皮稟火金之氣以生本經味

苦氣微溫日華子言涼然詳其用應是辛苦
溫之藥而其性則有毒也與巴豆牽牛大略
相似性沉而降陽中陰也入手足陽明經其
主暴水癥結積聚者皆二經為病苦能泄辛
能散溫能通行腸胃則諸證無不除矣

主治參互

肘後方二便關格二三日則殺人烏桕東南
根白皮乾為末熱水服二錢

簡誤

水腫多屬脾虛不能制水以致水氣泛濫法
當補脾實土為急此藥必不可輕用如果元
氣壯實者亦須暫施一二劑病已即去之

杉材微溫無毒主療漆瘡

疏○杉材得陽氣而兼金化本經氣微溫無
毒日華子加辛氣味芬芳可升可降陽也入
足陽明經本經主療漆瘡及蘇恭療脚氣腫

滿者皆從外治取其芬芳能解漆氣之穢惡
辛溫能散濕毒之衝逆也蘇恭又云服之治
心腹脹痛去惡氣日華子云治霍亂上氣無
非假其下氣散邪辛溫開發之功耳木皮主
金瘡血出及湯火傷灼取老樹皮燒存性研
傅之或入雞子清調敷一二日愈香油亦可

主治參互

同橘皮木瓜香薷砂仁白藟豆石斛治暑月

霍亂轉筋 柳柳州纂救死三方云元和十

年二月得脚氣夜半痞絕脇有塊大如石且
死困不知人三日家人號哭滎陽陳洵美傳
杉木湯服半食頃大下三行氣通塊散方用
杉木節一大升橘葉切一大升無葉則以皮
代之檳榔七枚童子小便三大升共煮一大
升半分爲兩服若一服得快卽停後服此乃
死病會有效者乃得不死恐人不幸病此故

傳之 危氏得効方小兒陰腫赤痛日夜啼
叫數日退皮愈而復作用老杉木燒灰入膩
粉清油調傅効 救急方臘瘡黑爛多年老
杉木節燒灰麻油調隔箬葉攤貼禁定數易
即愈 除轉筋脚氣外他用甚稀故不著簡
誤

接骨木味甘苦平無毒主折傷續筋骨除風癢
齧齒可作浴湯

疏○接骨木稟土氣以生故其味甘苦氣平
無毒甘能入脾養血故主折傷續筋骨苦涼
能除風濕浮熱故主風癢齧齒也千金方打
傷瘀血及產婦惡血一切血不行或行不止
竝煮汁服

主治參互

易簡方治折傷筋骨接骨木半兩乳香半錢
芍藥當歸川芎自然銅各一兩爲末化黃蠟

四兩投藥攪勻衆手丸如芡實大若止損傷
酒化一九若碎折筋骨先用此敷貼乃服無
別用故不著簡誤

樺木皮味苦平無毒主諸黃疸濃煮汁飲之良
疏○樺木皮生於西北陰寒之地故其味苦
氣平無毒氣味俱薄降多升少陰也入足陽
明經五疸皆濕熱鬱於陽明所致苦平能除
濕熱故主諸疸也藏器以之治傷寒時行熱
毒瘡宗奭以之治肺風毒皆取其苦涼能散
風邪熱毒之義耳

主治參互

靈苑方乳癰初發腫痛結硬欲破一服卽瘥
以北來真樺皮燒存性研無灰酒服方寸匕
卽臥覺卽瘥也 唐瑤經驗方乳癰腐爛靴
內年久樺皮燒灰酒服一錢日一服 和劑
局方肺風毒瘡遍身瘡疥如癩及癰癬瘙癢

面上風刺婦人粉刺竝用樺皮散主之樺皮
燒灰四兩枳殼去穰燒四兩荆芥穗二兩炙
甘草一兩各為末杏仁水煮過去皮尖二兩
研如泥研勻每服二錢食後溫酒調下瘡疥
甚者日三服

簡誤

脾胃弱易於作泄者忌之

木鼈子味甘溫無毒主折傷消結腫惡瘡生肌

止腰痛除粉刺黥黯婦人乳癰肛門腫痛

疏○木鼈子稟火土之氣感長夏暑熱之令
以生故其味甘氣溫無毒味厚於氣可升可
降陽也為散血熱除癰毒之要藥夫結腫惡
瘡粉刺黥黯肛門腫痛婦人乳癰等證皆血
熱所致折傷則血亦瘀而發熱甘溫能通行
經絡則血熱散血熱散則諸證無不瘳矣其
止腰痛者蓋指濕熱客於下部所致而非腎

虛為病之比也用者詳之

主治參耳

孫用和秘寶方肛門痔痛用木鼈仁三枚砂盆搗如泥入百沸湯一盞乘溫先熏後洗日用三次仍塗少許 聖惠方耳卒熱腫木鼈子仁一兩赤小豆大黃各半兩為末每以少許生油調塗之

簡誤

木鼈子味甘而氣則大溫本經雖云無毒然亦未免有毒但宜外用勿輕內服劉續霏雪錄云木鼈子有毒不可食昔薊門有人生二子恣食成痞其父得一方以木鼈子煮猪肉食之其幼子當夜死長子明日死其為毒雖未如此之厲然亦必非純粹之物也 ○番木鼈形小於木鼈而色白味苦氣寒性無毒主傷寒熱病咽喉痺痛消痞塊竝含之嚥

汁醫方摘要治喉痺作痛用番木鱉青木香
山豆根等分爲末吹之

簡誤

番木鱉性大寒味至苦凡病人氣血虛弱脾
胃不實者慎勿用之

釣藤微寒無毒主小兒寒熱十二驚癇

疏○釣藤稟春氣以生木經氣微寒無毒保
昇言苦甄權言甘平應是甘苦俱不甚氣味

悉和平者也爲手少陰足厥陰經要藥少陰
主火厥陰主風風火相搏則爲寒熱驚癇此
藥氣味甘寒直走二經則風靜火息而肝心
寧寒熱驚癇自除矣甄權主小兒驚啼瘈瘲
熱壅客忤胎風者亦此意耳

主治參互

得遠志茯神琥珀棗仁丹砂牛黃天竺黃犀
角屑生地黃龍齒麥門冬金箔治小兒驚癇

瘰癧有痰加竹瀝南星橘紅 聖濟錄小兒
驚熱釣藤一兩消石半兩炙甘草二錢五分
為散每服半錢溫水服日三服 聖惠方卒
得癩疾釣藤炙甘草各二錢水五合煎二合
每服棗許日五夜三 除小兒驚癩外無他
用故不著簡誤

赤檉木無毒主剝驢馬血入肉毒取以火炙熨
之亦可煮汁浸之

疏○赤檉木稟春陽之氣以生故其色青而
葉稍帶微赤凌冬不凋其味甘鹹其氣溫而
無毒浮而升陽也入足陽明手太陰少陰經
觀本經載其能解驢馬血入肉發毒者蓋以
驢馬性熱故多毒生時汗氣沾人即能為病
所以剝時熱血入肉亦能致毒此藥味甘鹹
甘得土氣鹹得水氣故能入血解血分之毒
也近世又以治痧癘熱毒不能出用為發散

之神藥經曰少陰所至為瘍癰正劉守真所謂諸痛癢瘡瘍皆屬心火之旨也蓋熱毒熾於肺胃則發斑癍於肌肉間以肺主皮毛胃主肌肉也此藥正入肺胃心三經三經毒解則邪透肌膚而內熱自消此皆開發升散甘鹹微溫之功用也

主治參互

同石膏知母薄荷荆芥玄參牛旁子麥門冬

竹葉連翹黃芩甘草之屬治癍癰發不出或雖發不透如熱甚毒熾舌生芒刺大渴譫語癍色紫黑者加入三黃石膏湯內大効 單用及兼各藥竝主痧癍首尾諸證 治一切風不問遠近用赤檉木葉半斤切荆芥半斤水五升煮二升澄清入白蜜五合竹瀝五合新甌盛之油紙封入重湯煮一伏時每服一小盞日三服 酒多致病長壽仙人柳曬乾

為末每服一錢溫酒下 氣味甘溫性復無
毒除痧癩外他用甚稀故不著簡誤

水楊葉嫩枝味苦平無毒主久痢赤白搗和水
絞取汁服一升日二大効

疏○水楊葉嫩枝生於涯涘之旁得水土之
陰氣偏多故味苦氣平無毒久痢赤白腸胃
濕熱也得苦涼之氣則熱散痢自止今人
又用以治癰腫痘瘡効魏直博愛心鑑云

痘瘡數日陷頂漿滯不行或風寒所阻者宜
用水楊枝葉無葉用枝五斤流水一大釜煎
湯溫浴之如冷添湯良久照見纍起有暈絲
者漿行也如不滿再浴之力弱者只洗頭面
手足如屢浴不起者氣血敗矣不可再浴始
出及痒塌者皆不可浴痘不行漿乃氣滯血
滯腠理閉密或風寒外阻而然浴令暖氣透
達和暢鬱蒸氣血通徹每隨暖氣而發行漿

貫滿功非淺也若內服助氣血藥藉此升之其効更速直見一嫗在村中用此有驗叩得其方行之百發百中慎勿易之誠有燮理之妙也

柞木皮味苦平無毒治黃疸病皮燒末服方寸七

玃○柞木卽鑿子木處處山中有之葉小而
有細齒光滑而韌其木及葉丫皆有針刺經
冬不凋五月開碎白花不結子木心裏皆白
色本經味苦氣平無毒然其性又善下達主
黃疸病者蓋黃疸因濕熱鬱於腸胃而發此
藥苦能燥濕微寒能除熱兼得下走利竅之
性則濕熱皆從小便出而黃自退矣今世又
以爲治難產催生之要藥亦取其下達利竅
之性耳同魚膘人參千里馬百草霜牛膝白
芷當歸益母草爲催生聖藥無別用故不著

參互及簡誤

櫻櫚皮平無毒止鼻洪吐血破癥治崩中帶下
腸風赤白痢入藥燒灰用不可絕過

疏○櫻櫚皮稟微陽之氣以生故其味苦瀼
氣平無毒本經主諸病皆燒灰用者凡血得
熱則行得黑灰則止故主鼻洪吐血苦能瀉
熱瀼可去脫故主崩中帶下及腸風赤白痢
也止血固脫之性而能消瘀血故能破癥也

凡失血過多內無瘀滯者用之切當與亂髮
灰同入更良如暴得吐血瘀滯方動暴得崩
中惡露未竭濕熱下痢初發腸風帶下方熾
悉不宜遽用卽用亦無効入藥須年久敗者
良

木槿平無毒止腸風瀉血又止痢後熱渴作飲
服之令人得睡入藥炒用

疏○木槿本經氣平無毒詳其主治應是味

苦氣寒清熱滑利之藥腸風瀉血濕熱留中
也痢後作渴餘熱在經津液不足也夜臥少
睡心經蘊熱虛煩不寧也苦寒能除諸熱滑
利能導積滯故主如上等證今人用治癬瘡
多取川中所產肉厚而色紅者彌良花功用
相同作湯代茶兼能治風

主治參互

扶壽方牛皮癬川槿皮一兩大風子肉十五

箇半夏五錢剉河水井水各一盃浸六七宿
入輕粉一錢秃筆掃塗覆以青衣數日有臭
涎出妙忌澡浴 簡便方癬瘡有蟲川槿皮
剪入肥皂浸水頻頻擦之或以槿皮浸汁磨
雄黃尤妙



